



6

34-d

43

6

24 A

21

bliotheca
Coll. Rom.
et. Jesu

45.

d.

13.

45

d

10

45! 4.13.



CASILDE,

OV

LE BON-HEVR DE
L'HONNESTETE.

P A R

MONSEIGNEVR DE
BELLAY.



A P A R I S,
Chez I E A N M O R E A V, rue S.
Iacques, au Globe Celeste.

M. D C. XXVIII.

Avec Privilège du Roy.



A MONSEIGNEVR,

LE D V C

D'ATRIE.



MONSEIGNEVR,



*La vertu n'est pas
tousiours gourmandee par l'in-
solence de la fortune contraire;
Quelquefois , à la façon du
Geant de la fable , elle se releue
plus forte de son terrassment,
&, comme la palme, elle se rend
plus vigoureuse par le poids qui
l'opresse. C'est vne vigne qui
deuiet fertile par ses retran-
chemens , vne Camomille qui*

à iij

ÉPISTRE.

profite plus elle est foulée, vn
poil qui s'espaissit plus il est ra-
zé. Les obstacles ne seruent qu'à
l'animer, & les combats qu'à
rendre ses victoires plus glorieu-
ses, & ses triomphes plus signa-
lez. Le Sauueur qui scauoit la
maladie du Lazare ne le laissa
mourir que pour le resusciter
avec plus d'esclat, esleuant de sa
mort vn trophée à sa gloire. Et
cet ancien Patriarche dont la
patience sert de spectacle & de
miroir au monde, ne fut reduit
aux extremitéz où il se vid ab-
batu, que pour se voir restabli en
vne magnificence incomparable-
ment plus grande que sa condi-
tion precedente. Le Fils de Dieu

EPISTRE.

mesme n'a esté humilié par son
Pere iusques à la mort, & la
mort ignominieuse de la Croix,
que pour estre plus exalté en la
gloire, & pour auoir vn nom
qui fust au dessus de tout autre.
Dieu ne permit la destruction
de son temple & de ses autels
par les Babylonniens, que pour
rendre la splendeur de la secon-
de maison plus eclatante que cel-
le de la premiere. Les eaux vi-
ues que lon resserre en des ca-
naux estroits, & que lon fait
descendre fort bas en rejallissent
d'autant plus haut, & remon-
tent ioursiours à l'esgal de leur
source; c'est pour cela que le
Messie est appellé vne source vi-
à iij

ÉPISTRE,

ueriealiffante à l'éternité. La
vertu est ce puits des iardins, &
ce puits des eaux vines qui cou-
lent du Liban avec vehemence :
elle est ce fleuve impetueux qui
arrose vne belle ame que le Pro-
phete nomme la Cité de Dieu.
Elle peut estre comparee à ce
fleuve qui passe d'Eliee en la Si-
le, & qui perce la mer sans ren-
dre ses eaux ameres pour les vnir
à la douceur d'vne claire fontai-
ne. Elle ressemble au Soleil qui
peut estre pour vn temps offus-
qué par des nuages : mais qui
creue en fin ces foibles obstacles,
pour faire paroistre ses rayons
d'autant plus vifs, & poignans,
que leur pointe a esté plus lon-

EPISTRE.

guement rebouschee. Ne semble-il pas que Dieu n'eust permis la decadence de la fortune de Ruth & de Noemi, que pour rendre leur eleuation plus illustre? Certainement la parole de verité a tres-bien dit que la patience des pauvres ne perira point à la fin, mais qu'elle obtiendra de l'avantage en ses pretensions Pour le cri des affligez, & le gemissement des oppressez ie me leuerray en leur aide, dit le Seigneur. Il arrive d'ordinaire aux vertueux ce qui arriva vne fois à Themistocle, que le debris de sa fortune en son pais esleua au faiste de toute grandeur en vn estrangier. C'est ce que

à v

EPISTRE.

Dieu promet à ceux qui lui sont
fidèles, de leur faire tirer du
profit de leurs tribulations, &
de souffrir qu'ils soient abbatus
afin de les releuer par miracle &
avec pompe. l'avance tout cecy
sur le sujet de l'Histoire que ie
vous presente, où vous verrez
comme dans vn miroir le triom-
phe de la vertu sur la fortune,
& le vice auparavant superbe
& esclattant terrassé avec au-
tant de honte que de iustice.
Vous y remarquerez comme
ceux-là ne sont iamais alterez
qui s'abreuvent aux eaux vi-
ues de la grace du Ciel, & que
ceux qui cherchent Dieu en
leurs actions ne manquent ia-

ÉPISTRE.

mais d'aucun bien, parce que tout succede heureusement à ceux qui aiment Dieu, & qui le recherchent de toute leur ame. Au contraire que ceux qui le delaissent, (luy qui est vne fontaine de vie) pour se creuser des cisternes mal cimentees, & qui ne peuvent retenir l'eau, n'ont iamais d'heureux succez en leurs affaires: par ce qu'il est escrit que ceux qui delaissent Dieu en seront abandonnez, & que les noms de ceux-là seront escrits en la terre (où tout est passager) & non au Ciel (où tout est stable) qui se retirent de sa suite. Il vous souvient ie m'en assure, de plusieurs autres choses que ie

EPISTRE

vous ay autrefois dites deuant
Dieu sur ce sujet, dont vous ver-
rez les maximes verifiees en ce-
te narration, de laquelle vous ti-
rerez vn affermissement en cete
forte & constante vigueur d'es-
prit que i'ay tousiours remar-
quee en vous parmi tant d'espi-
neuses affaires, où Dieu a exercé
vostre vie. Aussi auez-vous
tousiours fait comme les bons
Nochers qui ne regardent que
le Ciel parmy les orages, &
qui ont sans cesse l'œil vers le
Nord pour regler leurs nauiga-
tions. C'est là que vous tient co-
lé vostre conuersation ordinaire,
principalement depuis qu'il a en-
leué à soy sur vn Chariot ar-

EPISTRE.

dent de z le & de pieté cette
vertueuse Dame qu'il vous
auoit donnee pour compagne &
dont il a fait vn astre nouveau.
C'est maintenant que cette ame
heureuse qui a este ici bas parti-
cipante de vos déplaisirs, & que
Dieu a exercee par beaucoup de
souffrances, peut dire avec le
diuin chantre qu'elle est entree
au rafraischissement eterneel par
les eaux & les feux des tribula-
tions. Mais s'il est vray, com-
me la sainte parole nous en as-
seure, que les travaux de cette
vie ne sont point dignes d'estre
comparez aux felicitez qui les
doiuent couronner en l'autre :
quelle consolation vous doit re-

ÉPISTRE

ster, estant rendu certain par le mesme tesmoignage de la verité, que ces legers momens d'afflictions qui nous accueillent icy bas attirent en nous le prix immortel de la gloire, & nous donnent entree au Royaume qui n'a point de fin? C'est ainsi que par le temple du travail on entre en celuy de la vertu, & que par celuy de la vertu on passe en celuy de l'honneur: Selon la promesse infailible, qui attribue la beatitude à ceux qui endurent pour la Justice. Tout cecy n'est point tant vne asseurance de foy en vous qu'une preuve de l'experience: puis que vous voyez dès ce monde le soin que Dieu prend

EBISTRE.

de vous protéger contre ceux qui
vous trauersent & d'appuyer
vostre maison, à qui la passion
& la fidelité de vos ancestres
pour nos Monarques auoit fait
prendre coup vers sa cheute. Ce
grand ouurier, de qui les œuvres
sont parfaites, acheuera sans
doute celle qu'il a commencee en
vous, & versera tant de bene-
dictions sur vostre famille, que
nous verrons en vous la vertu
trionphante du malheur; prin-
cipalemēt si les vœux sont exau-
cez, de celuy qui est, en termes de
verité & d'une charité sincere,
MONSEIGNEVR,

Vostre tres-humble & tres-
affectionné seruiteur

JEAN PIERRE, E. de Belley,



CASILDE.

LIVRE PREMIER.



Elabouche des mal-
contens sortent ces
plaintes ordinaires :
que toutes les portes sont
fermees à la Vertu pour arri-
uer aux biens & aux hon-
neurs : que la recompense
s'enfuit deuant le merite , &
que de valoir quelque chose ,
c'est le moyen de n'auoir rien :
Mais qui ne voit que ce sont

A

là les communes doleances
des Pedans , qui se voyans en
arriere de leurs pretensions,
s'escrient que le siecle est de
fer pour les bons esprits, &
quel ingratitude regne tyran-
niquement dans le monde?
Pauvres gens qui s'imaginent
que de leurs escoles, theatres
de leurs vanitez & de leurs fo-
lies, on les doive esleuer aux
Tribunaux, ou aux Prelatu-
res ou les appeller aux con-
seils des Rois pour regenter
des Monarchies. Esprits en-
flezd d'une sottise presumption,
qui comme ces fausses glaces
qui estendent les objets, leur
fait voir leur propre valeur

L I V R E I.

3

d'une grandeur demesurée. Cependant tandis qu'ils s'en prennent au Ciel & à la terre du malheur de leur tēps & de l'aueuglement de leur âge qui met, à leur auis, les personnes de consideration à l'ombre & les impertinens au Soleil, & qui cache les claires lampes sous le boisseau & plante sur le chandelier des flambeaux amortis, les plus aulsez serient de leur ineptie. Leurs mescontentemens les rendent d'autant plus mesprifables qu'ils s'estiment dignes de tenir vn rang plus esleué à dire la verité : la haine que la fortune a de tout

A ij

temps conceuë cōtre la vraye vertu est implacable , & leur inimitié semble plus irreconciliable que celle de ces deux freres qui se continuant dans leurs cendres partagea les flāmes de leur commun buscher. Il ne fut iamais que la fortune ne persecutast la vertu , & que la vertu ne meprisast ses persecutions & ne desdaignast ses faueurs : la fortune voyant qu'elle ne peut donner de l'habileté ny du merite à ses fauoris , elle leur donne tant de bon-heur, que iettant cet esclat dans les yeux de la vertu il est mal-ayse toute constanté & ferme que

L I V R E I. 5

soit celle-cy, qu'elle ne s'en despire. C'est ce qui a fait glisser les pas & esbranlé les pensées de ce grād Roy, qui estoit selon le cœur de Dieu, lors qu'il voyoit la paix & l'abondance des pecheurs, & comme ils estoient exépts des traverses de la mauuaise fortune, iusques à se porter à ces paroles de precipitation, qu'il auoit en vain iustificié son cœur & laué ses mains parmy les personnes innocentes, puis qu'il estoit accablé de fieux & chastié comme coupable. Toutefois il s'abbat à la fin, & reconnoissant que la felicité des meschans est de peu de

duree & qu'elle passe comme vn songe, il se resout de s'attacher à Dieu avec de nouveaux liens , reconnoissant que ceux qui s'esloignent de luy perissent miserablement, & que ceux qui s'escartent de ses voyes ne paruiennent iamaïs au salut eternel qui est le comble de tous biens, & le seul blanc digne des pretensions d'une ame genereuse. L'histoire des Romains esleue iusques aux Cieux la valeur de ce Brutus, qui pour redonner la liberté à son pays en tuant le Tyran n'auoit pas pardonné à son propre Pere. Mais tout de mesme que les

lampes d'huile ordinaire laissent de la puanteur quand elles s'esteignent : aussi le courage de cet homme luy faillit au besoin, laissant en sa mort vne mauuaise odeur de son nom, lors que vaincu en la bataille de Pharsale auant que de se tuer comme desesperé il se repentit d'auoir durant sa vie suiui le party de la vertu; en la mesme façon que se plaindroit vn Amant qui auroit perdu son seruice à la recherche d'vne Maistresse infidelle ou ingrate. Certes la condition de la vertu seroit deplorable, si elle estoit contrainte de dependre de son

ennemie : cette liberté dont elle fait sa principale gloire, seroit changee en vne honteuse seruitude, si elle s'attachoit à des faueurs si caduques que celles que dans le monde on qualifie du nom de biens. Elle ressemble aux pierreries qui ne prennent leur prix & leur lustre que de leur propre esclat. La vertu ne veut estre riche que de sa propre richesse, & elle n'est plus vertu qu'ád elle cherche quelque salaire hors de soy. Car tout ainsi que le vice est haïssable pour sa laideur naturelle, ce qui faisoit dire au grand Stoique qu'il ne commettrait

iamais vne meschanceté quād
il sçauroit que les hommes
l'ignoreroient, & seroit assen-
ré d'en receuoir le pardon du
Ciel. Aussi la vertu est-elle si
estimable d'elle mesme que la
plus iuste & precieuse recom-
pense des bonnes actiōs c'est
de les auoir faites: le temoi-
gnage de la propre conscien-
ce estant beaucoup plus desi-
rable qu'une grande reputa-
tion. Et en cela il faut reco-
gnoistre vn rayon de la diui-
nité en la vertu, parce qu'elle
est contente de soy, tout de
mesme que Dieu a sa beatitu-
de en soy-mesme. Tant s'en
faut donc que la vertu men-

die du secours de la bonne fortune, qu'au contraire vn ancien Philofophe a dit que l'aduerfité eftoit fa mere & la prosperité fa marastre, les faueurs de celle là luy eftans auffi perilleufes que les disgraces de celle cy auantageufes & fauorables. Que si quelquefois la fortune luy monftre vn vilage riant, elle s'en deffie comme d'yne trahifon, fçachant que cette trompeufe la veut eftouffer en l'embrassant, & l'eflauer ainfi que l'Aigle la Tortue, pour l'ecrafer en la laiffant tomber du haut. La bonace de cette mer d'inconftance luy est

L I V R E I. 11

suspecte comme voisine d'un
 orage , sçauante qu'elle est
 que les presens des ennemis
 ne sont iamais sans malice.
 Que si la fortune la contrarie
 elle se resjoüit dans les tribu-
 latiôs en la mesme façon que
 les Aigles & les Dauphins
 s'esgayent parmy les tempe-
 stes de l'air & des eaux. Car
 Comme les genereux Soldats
 se plaisent dans les perils, aussi
 la vraye vertu se delecte dans
 les contrepointes de la fortu-
 ne ; sa lumiere n'eclatant ia-
 mais si viuement que parmy
 les tenebres de la mesme for-
 te que le Soleil dont le visage
 se monstre plus vif quand il

A vj

sort de deffous vn nuage. Ce n'est pas neantmoins pour rendre cete regle generale qu'il n'y ait point de prosperité pour la vertu & qu'elle ne le puisse quelquefois rencôtrer au train de la bonne fortune : Puis que la vertu ainsi que Cæsar portant son bonheur avec soy peut estre heureuse parmy les malheurs, & fleurir comme vne rose au milieu des espines. Bien que la fortune & la vertu iouent au bouchors, vne grande prosperité corrompant les meilleures habitudes, & les grands courages mesprisant les felicitez passageres : si est-

ce qu'en ce ieu où la vertu est
quelquefois en chāce & dans
le cours des affaires humaines,
elle emporte à la trauerse
quelque coup de dé en despit
de la fortune. Je confirmeray
tout ce que ie viens d'auancer
par vn exemple remarquable
par le recit d'un euenement
arriué en nos iours, auquel on
verra vn chastiment du vice
tellemēt signalé & vn si glo-
rieux Triomphe de la vertu,
que celuy qui le lira sera con-
traint d'auoüer que l'hon-
neur a du bon-heur dés ce
monde , & que ses actions
genereuses sont suiuiues de no-
tables prosperitez.

Les Gouverneurs des Provinces en nostre Monarchie ont poussé si auât leur autorité, que le tiltre de Viceróis semble au dessous de leur pouuoir. Les Palatins de Pologne qui sont comme Souuerains en leurs Palatinats & tant de Princes de l'Empire qui ont mis en Alemagne l'Empereur au rabais, ne semblent point plus autorisez dans les terres soumises à leur conduite que ces petits Roys que nous voyons dans nos Gouvernements. Ceux qui ont du zele pour l'autorité Royale s'ombragent de celle cy, & souhaitent pour

la conseruation de cette Monarchie, la premiere & la plus ancienne qui soit entre les Chrestiens, de voir ses ailles retranchees à ceux qui semblent vouloir balancer la puissance de leur maistre: mais c'est vne chose plus à desirer qu'à esperer tant que ces charges dureront autant que la vie de ceux qui les possedent, & tant que par des suruiuances, dont l'iniustice est visible, ils les continueront à leur race par vne espece d'heritage. Je dis cecy sur le sujet qui fait l'entree de cete narration, où lon verra vne vertu eclatante contre la tyrannie de la gran-

deur & en fin, glorieusement
recôpensée, lors que le Grand
Henry eut conquis à la poin-
te de son espee le Royaume
que le sang de saint Louys
luy donnoit par succession, &
que se reposant à l'ombre de
tant de Lauriers qui environ-
noient sa teste triomphante
dans le sein d'une heureuse
paix, il redonnoit petit à pe-
tit à cette Monarchie sa pre-
miere splendeur que la fureur
des discordes ciuiles auoit ob-
scurcie. Vn des Grands de sa
Cour (ie ne veux point parti-
culariser s'il estoit Prince ou
non pour ne donner trop de
prise à la coniecture) n'ayant

pas trouué en l'occurrence de quelque affaire la satisfaction qu'il desiroit, se retira de Paris dans son Gouuernement pour y digerer plus facilement l'amertume dont son ame estoit remplie. Tant de Monstres que cet Hercule auoit domptés retenoient ce courage irrité dans vne obeissance craintiue: car il venoit de voir par l'estouffement de la ligue de combien de foudres ce Iuppin auoit ecrazé la teste de ces Geans. Ne pouuant donc minuter aucune reuolte sans attirer sur soy vn bouleuersement de sa fortune par vne cheute dont il ne se releueroit

iamais , il iugea qu'il estoit plus à propos de diuertir son esprit des pensées d'õt les desseins ne pourroient reüssir qu'à son dommage & à sa honte , & en destournant ses yeux des objets desagreables de les retourner vers ceux qui luy pourroient apporter du plaisir. Le grand ressort de l'esprit des Grands c'est le contentement : c'est là l'intelligence qui fait mouuoir ces hautes Spheres. Il est vray qu'ils entraînent tout le monde à leur suite : mais ils sont les premiers entraînés par la volupté. Et comme les Planettes de Mars & de Venus ont des

regards dans le Ciel, les courages martiaux en la terre sont ceux qui se laissent plus aisement emporter à l'amour: si bien que victorieux des hommes par leur valeur, ils sont vaincus par les femmes pour leur lascheté. Nostre gouverneur qui se fera désormais connoître sous le nom d'Adolphe au commencement de la retraite pour se débarrasser son esprit de son mécontentement, & le débrouiller des inquiétudes qui l'agitoient, se mit à chasser avec tant de violence qu'il estoit nuit & jour dans les forêts dont il troubloit la paix

& le silence. Comme si hors de la cour la conuersation des hommes lui eust esté importune, il en fuyoit l'abord pour donner à ses resueries l'aliment qui leur est si propre, la solitude. A la fin ce penible exercice le lassa, estant mesme arriué à vn âge qui exempte les plus ardents de ces violentes courées qui ne peuuent estre supportées que d'une verte ieunesse. Il laisse donc cette vie sauuage & farouche, & se retirant dans vne des principales villes de sa prouince, il se rend plus sociable & accostable : il se met dans le ieu & les compagnies, & tâ-

che d'estouffer son desplaisir
 secret dans des diuertissemens
 publics. Il n'y auoit pas long-
 temps que la mort de sa fem-
 me sage & vertueuse dame
 autant qu'aucune de son réps
 l'auoit rendu veuf , si bien
 que la continence lui estoit
 vne chose nouuelle. Il auoit
 passé vne ieunesse assez licen-
 tieuse, & mesme dans le ma-
 riage il n'auoit pas esté plus
 retenu, bien qu'il fust bien
 aise de voir en sa partie vne
 fidelité, dont luy mesme se dis-
 pensoit peut-estre sans beau-
 coup de scrupule, & cela se-
 lon l'vsage de la cour & le
 torrent du monde qui em-



portez les plus reſervez. O maris , ſ'eſcrioit icy vn Pere de l'Egliſe , de quel front oſez vous exiger de vos femmes vne foy que vous ne leur gardez , plus ſoigneux de leur conſcience que de la voſtre , & trouuant mauuais en autrui ce que vous autorifez en vous meſmes ! En la diſpoſition du perſonnage dont l'amour auoit en tout le courant de ſa vie rauie les inclinations , demandez vous ſi ſon œil ſelon les paroles de Iob luy deſroba l'ame dès les premiers objets qui luy parurent agreables ? Mais comme il n'y a rien de moins compatible que l'a-

mour & la Majesté, si d'un costé sa qualité le rendoit considerable, de l'autre elle le rendoit suspect : & par ce que tous les yeux estoient tournez sur luy, il ne pouvoit attacher les siens sur aucun sujet, qu'aussitost ses regards ne fussent remarquez & pris pour les futurs presages de la ruine de l'honnestete de celles qu'il consideroit trop attentives. Si bien que les mieux aisees euitoient sa rencontre comme vn escueil, & fermoient les oreilles à ses cajoleries comme au chant dangereux d'une Sirene. C'est vne des incommoditez de la

grâdeur, d'estre tousiours à la
 veuë de tant de gens, qu'il
 semble qu'elle ne viue que sur
 vn theatre où ses moindres
 actions sont eclairees de tout
 le monde, & tousiours inter-
 pretees en la plus mauuaise
 façon. Tandis qu'il cherche
 des brifans pour faire naufra-
 ge, les Vagaos ne manquent
 pas à cet Holopherne qui luy
 cherchét de la proye de quoy
 contenter ses appetits, tandis
 que ces infames limiers qui
 chassent de haut vent sont at-
 tentifs à leurs malheureuses
 pratiques, & que par des mi-
 nes secretes ils tâchent de
 bouleuerfer l'honneur des
 maisons,

maisons , Adolphe qui portoit par tout l'Enfer de sa couoitise desreglee , sans le respect du lieu sacré ny des redoutables mysteres qui s'y traittent, s'y laissa prendre par les yeux en les arrestant sur vn objet, dont la petite qualité luy en fit aussitost iuger la conqueste facile. La vefue d'vn marchand qui viuoit en partie du trauail de ses mains, en partie du peu de bié que son mary luy auoit laissé, menoit à l'Eglise deux filles qu'elle auoit pour y entendre les diuins offices. L'aînée que nous appellons Casilde en vne taille haute & droite, & sur

vn visage blanc & vermeil, faisoit paroistre vne si bonne grace iointe à tant de modestie, qu'encore qu'elle n'arrestât ses yeux sur aucun ; & tenoit les yeux d'un chacun attachés à elle : elle auoit à ses costez sa cadette qui n'estoit pl⁹ ieune que de quelque année : cete-c^e sous vn teint clair, brun & vn port étudié, faisoit paroistre d'as vne humeur volage tant d'affetteries, que ses yeux noirs & petillans en leurs prunelles pirouettantes rendoient vn resmoignage assez manifeste du dèreglement de ses pensees & de la legereté de son esprit. Si par

la regle des contraires les claires redoublent leur esclat par le voisinage des brunes, il faut auouer que la contenance desordonnee de cette cadette, dont le nom sera Sebastie, seruoit d'un fonds obscur pour releuer la beauté de la discretion & de la pudeur qui paroissoit aux gestes & en la presence de Casilde. Et comme il n'y a rien qui iette tant d'huile sur le feu de l'amour que l'honnesteté, ny rien qui l'esteigne si tost que l'indiscretion & l'effronterie, autant de cœurs que Sebastie esloignoit de soy par son indiscretion, autant en cōqueroit Casilde.

sans y penser par la prudence de sa conduite. Blandine leur Mere les regardoit comme le sujet de son esperance, les regardoit comme celuy de ses craintes & les esleuoit avec autant d'honneur & de sagesse que lon en pouuoit desirer d'une femme de sa condition. Et parce qu'elle sçauoit que la pieté estoit la plus forte bride pour contenir cette ieunesse en son deuoir, elle s'effayoit par la frequentation des Eglises & des lieux de pieté de graver insensiblement en ses ames qu'elle conduisoit vne vraye deuotion, qui les retirast des pieges & des vanitez

du monde, & les conseruaſt entieres & pures des contagions du ſiecle tout plongé dans la malice, pour viure en Saincteté & en iuſtice deuant la face de Dieu. O quelle ioye au cœur de cette bonne mere, quand elle conſideroit l'image d'une ſolide & genereuſe vertu peinte ſur le front de ſon aiſnée! mais cōme toutes les choſes humaines ont leur contrepoids, quel glaïue de douleur luy perçoit le cœur, quand elle cōſideroit les legeretez & les inclinations à la vanité que Sebaſtie ne faiſoit que trop paroître! Certes, elle pou-

uoit appeller l'une la fille de sa consolation, & l'autre de sa tristesse : l'une sa Benjamine, l'autre sa Benonie. Ce n'est pas qu'elle ne la reprist de ses sottises, & qu'elle ne tâchast de la corriger de ses imperfections : mais à n'en mentir point, c'estoit d'une façon si molle & si languide que cela ne seruoit qu'à la rendre plus imparfaite : & ses reprehensions ressembloient à l'eau dont se seruent les forgerons pour rendre leurs flammes plus âpres ; les vices ne veulent point estre traittez de main morte, il les faut trencher,

couper, arracher & faire comme les Chirurgiens qui trencent aux vicerés dans le vif pour ôter ce qu'il y a de pourri. Le Pere dit le Sage, qui espargne la verge perd son enfant. L'impunité rend les fautes incurables. Mais quoy, il y a tousiours dans le cœur des meres vne certaine tendresse naturelle pour leurs enfans, & cette sorte amour les aucugle ou au moins les esblouit : de sorte qu'elles ne voyent point leurs deffauts ou elles ne les voyent qu'à moitié: ce qui cause cette indulgēce, source de la ruine de ces tendres ames. Nous en

verrons l'effet en la cheute de Sebastie, & vn traict de l'admirable prouidence de Dieu dont les yeux regardent les iustes, & les oreilles sont attentiuës à leurs prieres en la conseruation presque miraculeuse de Casilde : Sur laquelle le gouuerneur ayant arresté ses yeux, yeux desquels on peut dire ce mot du Prince des Apostres, qu'ils estoient pleins d'impureté & d'vne conuoitise continuelle, l'inquietude aussitost s'empare de son ame, de laquelle il ne pensoit pas se pouuoir faire quitte que par la possession de celle qui en estoit l'inno-

cente cause. Si les petits compagnons sentent les tourmens d'Ixion, quand leurs pretensions sont trop eleuées, & quand le mesme sujet qui fait naistre leurs desirs, fait mourir leurs esperances: Les grands ne sont pas moins empeschez, lorsque leurs affectations s'attachent à des sujets de basse estoffe, pource que ce qui est blasimé aux premiers comme vne teméraire entreprise, l'est en ceux-cy comme vne lascheté: & les vns & les autres se rendent la fable & la risée de ceux qui s'apperçoivent de leurs desseins. Voila donc Adolphe en des ago-

nies qui se peuuent mieux
penser que descrire. Mais les
Herodes ne manquent iamais
de gens qui se rendent com-
plices de leurs meschancetez :
les mains des Princes sont ap-
pellées longues, pource qu'ils
atteignent par celles d'autrui
où les leur ne se peuuent
estendre. Les Vagaos depofi-
taires trop fidelles de ses infi-
deles pensées le flattent en
son mal , & enueniment sa
playe en la grattant , & en luy
promettant de brusser leurs li-
ures, ou de le faire venir à
bout de ses iniustes preten-
sions. Ainsi, dit le Chantre
diuin, Le pecheur est loüé aux

désirs de son ame, & on applaudit à ses iniquitez Les voyez vous qui tendent leurs pieges pour surprendre l'innocente, & qui creusent des fosses pour l'y faire tomber? Mais que ceux là soyent confondus qui trament des desseins malicieux inutilement: leurs toiles sont d'araignée, il ne faut qu'un simple foufle pour les dissiper: leurs flèches ardentes s'amortissent aupres de ce cœur de glace, & leurs traits ressemblent à ceux que porte en sa main vn enfant, main debile, incapable de les enfoncer & de faire vne large playe. Ils s'adres-

fent à la mere, croyans que ce chasteau gagné, la ville, ie veux dire la fille, se redroit incontinent: mais ils trouuent cette place imprenable, mesme avec le mulet chargé d'or que le Roy de Macédoine Philippe se promettoit de faire entrer dans les plus fortes Citadelles. Apres les promesses des montagnes d'or; ils font marcher les menaces: mais ce sont des vagues contre vn rocher, ce sont des vents qui affermissent cette palme à mesure qu'ils l'ébranlent: leur opiniatreté à la prier passe en importunité, & des-ja elle en emplit son

voisinage de plaintes. Il n'y a rien que les Grands redoutent à l'egal du murmure des peuples & d'une mutinerie : les exemples de Lucrece & de Virginie font voir quelles seditions s'émeuvent quand il est question de deffendre l'honneur des filles que la tyrannie veut opprimer. On arme les flancs des Elephans qu'on mene aux batailles, parce que c'est la partie qu'ils ont la plus delicate & la plus aisée à offencer. Ceux qui gouvernent passent en grandeur les Elephans , & peuvent estre nomméz des bestes de charge, puis qu'ils portent des châ-

steaux, des Villes & des Provinces sur leurs espauls: mais le talon par où ces Achilles sont vulnerables, le flanc par où ils sont faciles à percer, c'est leur reputation, dont ils gardent le lustre avec autant de soin que la prunelle de l'œil: d'autant que de sa perte suit l'infailible decadence de leur fortune, & la ruine de leur grandeur. Adolphe qui voit la sienne sur le point d'estre exposee au pillage des langues, arreste pour quelque temps les deshonneſtes ministres de ses passions de-reglees, & couurant son feu de cendre pour resmoigner

qu'il est amorti, en rend la chaleur plus ardente & moins supportable. Souuent transporté d'une fureur brutale il pensoit à un enleuement, voulant emporter de force ce qu'il ne pouuoit acquerir par douceur, & se seruir du fer où l'or ne pouuoit ioindre: mais quand il pensoit à l'esclat que feroit une action si deshonorabile aux oreilles d'un grand Monarque ennemy iuré de semblables outrages, cela modereroit son impetuosité. Quittant donc la peau du lyon il auisa d'employer celle du renard, auisant ses limiers de se seruir des plus sub-

tiles ruses qu'ils pourroient inuenter sans espargner l'argent en vne occasion qu'il auoit tant à cœur. Il ne falloit plus penser d'aborder la mere ny la fille, car celle-là comme vn dragon, veilloit si soigneusement sur celle ci, & celle-ci euitoit avec tant d'estude les occasions d'estre veuë, ne prestant ses oreilles à aucun cajolleur, qu'il sembloit que ce fust tenter l'impossible que de former des entreprises sur vne personne presque inuisible. O metal F de la fille d'Acrise, qui penetrez dans les tours où le Soleil peut à pene faire en-

trer ses rayons! Qu'on ne parle plus des subtils effets de la foudre à comparaison des vôtres. Il n'est rien de si sacré qui ne trouve son sacrilege, rien de si saint qui ne soit profané par des mauvais esprits. Vne vieille voisine du logis de Casilde, que pour sa malice nous appellerons Melisse, fut trouvée propre à acheminer le pernicieux dessein qu'Adolphe avoit de ruiner la pudicité de Casilde. Cette maudite femme, du nombre de celles qui portent les autres au mal qu'elles ont exercé, lors que leur âge les en rendoit capables, menoit

ordinairement ses execrables pratiques sous le saint mōtoir de la deuotion. On ne voyoit qu'elle dans les Eglises , où par vne impieté qui fait horreur à dire, elle brassoit ses malheureux desseins. Les longues habitudes qu'elle auoit prises à mal faire la rendoient desirëuse de voir pratiquer autrui les corruptions dont elle auoit perdu l'vsage. Cette cantharide venimeuse ne s'attachoit que aux plus belles roses, elle ne pouuoit souffrir l'integrité en vne autre, & celles qu'elle ne pouuoit peruerir elle les diffamoit les rendant criminel-

les en opinion , n'ayant pû les rendre telles en effect. Elle pensoit qu'il y allast de son honneur, que celuy d'un autre subsistât deuant elle : chassieuse comme Heli , elle ne pouuoit voir vne lampe si elle n'estoit esteinte ; & comme vne chauuessouris elle taschoit de l'amortir pour apres en boire l'huile, & remplir sa bouche de medifance. Quand l'amorce du lucre seruoit de ressort pour faire mouuoir cete machine , elle eust pû comme vn autre Archimede , enleuer vne constance aussi ferme que la masse de la terre. Rien ne pou-

uoit éuiter la face des enchātemens de cete forcierre qui eust pû arracher la Lune de sa sphere , & faire tomber les estoilles des Cieux. Et c'est icy qu'il faut que ie m'escric contre ces pestes des villes & ces pierres d'aschoppement, que c'est vne grande honte à la iustice publique d'en faire si peu de recherche, & de n'auoir point de chastimēt contre cete sorte de gens, que lon ne peut assez rigoureusement punir , & qu'il faudroit estouffer comme des monstres. Si lors que la rage porte les corps où les autres bestes sauuages & rauissantes

à se rassasier de la chair des hommes on fait des assembles pour leur donner la chasse & les exterminer; que ne deuroit-on faire contre ces harpies qui infectent les familles entieres de leur sale esment, & qui emplissent les maisons d'opprobre & d'infamie? Ceux qui corrompent l'honneur, la chose du monde que les grands courages estiment le plus, seront-ils moins chastiez que ceux qui alterent ou falsifient les monnoyes? y aura-il des loix severes contre les larrons & les meurtriers, & n'y en aura point contre ceux qui par

leurs pratiques deshonor-
rent des races entieres, & qui
font perdre aux filles ce qui
est irréparable & plus estimé
ny que les biens, ny que la vie?
Certes comme pour punir le
larrecin on ne se contéte pas
de chastier ceux qui font le
vol, mais la punition s'estend
iusques à ceux qui le recellent:
il faudroit aussi non seulemēt
chastier ceux qui rauissent
l'honneur au sexe, que son in-
firmité rend digne de com-
passion; mais faire sentir la
pesanteur des plus seueres su-
plices à ces pernicioeux esprits
qui en acheminent la ruine.
Melisse ayant eu les mains

dorces de ce metal, dont l'eclat esbloüit les yeux des plus innocens , promet d'employer toutes ses finesses pour le contentement d'Adolphe. Je ne veux point remuer la sentine de sa conduite pour n'en respandre vne odeur contagieuse : Je me contenteray de dire que le voisinage luy donnant accès en la maison de Blandine, & son hypocrisie assez de pied en la creance de cete bonne vesue, qui ne iugeoit d'elle que par l'apparence, elle y estoit receuë comme bonne amie & accueillie comme voisine. Souz ces manteaux

specieux d'amitié & de pieté,
quels feux & quelles flammes
ne jettoit point ce tison d'en-
fer, ce flambeau funeste ? Les
cœurs s'empoisonnēt par l'o-
reille comme les corps par la
bouche : la parole malicieuse
& seduifante , dit le texte
sainct , se glisse comme le
chancre ; comme il y a des
maladies contagieuses qui se
prennent par la conuersation
de ceux qui en sont atteints ;
aussi les mauuaises habitudes
se contractent par la frequen-
tation du meschant. Que si la
glace d'un miroir se ternit par
l'halene ; & si les fleurs d'un
bouquet perdent leur frai-
cheur

cheur & l'email de leur teint
à force d'estre flairees. Pen-
sons nous que la pureté,
qui est vne verru plus tendre
& delicate que la fleur, & plus
fragile que le verre, ne reçoive
pas de la tare & du dechet
par les discours pernicioeux de
ceux qui ont deffcin de la rui-
ner? Que le Psalmiste a gran-
de raison d'appeller heureux
celuy qui ne preste point l'o-
reille, & ne prend point de
part aux conseils des peruers :
qui cuite leur train, & ne s'af-
fied aupres d'eux pour s'arre-
ster en leur compagnie! Car
comme on deuient insensi-
blement bazané au Soleil, &

comme on remporte de mau-
uaises odeurs quand on de-
meure long temps dans vne
cuisine ; ainsi sans y penser
on tire à soy les qualitez vi-
cieuses de ceux avec qui on
conuerse. Qui pourroit expli-
quer les tortueux replis de ce-
te vieille Melisse, & de quel-
le façon ce dangereux scerpent
taschoit de peruertir ces filles
& les faire mordre au fruit
deffendu ? Les promesses de
richesses & d'honneur estoient
les fueilles d'or qui couuroiēt
l'amertume de ses pillules.
Mais comme la Galathee du
Poëte elle n'auoit pas plu-
tost lancé ces pommes d'or

L I V R E I. 51

qu'aussitost elle se relançoit
dās le taillis espais de mille pa-
roles obscures & ambiguës,
n'auançant iamais aucun dis-
cours qu'elle ne peust inter-
preter en bien, & luy donner
telle face & telle couleur
qu'elle eust voulu. Et comme
le vin meslé de jus de cicuë est
vn venin irremediable ; la
pieté qu'elle mesloit à ses
mauuais desseins en rendoit
l'atteinte plus dangereuse, à la
façon d'vn traict qui est ren-
du plus penetrant, estant tré-
pé dans l'huile. Qui croiroit
ce que ie vay dire, si l'expe-
rience ordinaire ne le rendoit
visible? Le crapaut par vne se-

cette propriété a ce pouuoir
d'attirer la belette de tant
loin qu'il l'apperçoit, & cet-
te pauvre petite beste en
criant & se débattant, parce
qu'elle connoit sa mort pro-
chaine, est contrainte devenir
mettre sa teste dans la gueu-
le beante de ce venimeux ani-
mal, où aussitost elle est estou-
fee. Les charmes de Melisse
curēt vn pareil ascendant sur
les esprits de la mere & des
filles, qui non seulement la
receuoient gracieusement en
leur maison : mais lui ren-
doient le reciproque en la vi-
sitant en la sienne: cette vieil-
le sçachant si bien couvrir

d'une feinte deuotion sa vie
& ses pratiques detestables ,
qu'encore qu'elle portast
l'enfer dans son sein, la serenité
de son visage sembloit ou-
rir le Paradis & la douceur
de ses propos enmiellez en-
promettre l'entrée. Les at-
traits de ses discours & de ses
caresses estoient autant d'a-
morces dont elle couuroit
l'hameçon de son traistre
dessein. Ayât donc appriuoisé
ces filles innocentes en sa
maison, & les conjurant d'y
venir souuent pour moderer
par leur presence les chagrins
de son âge & les ennuis que
la solitude traine avec soi par

cette frequentation ordinaire ; elle prend pied en leur croyance , elle sonde leurs humeurs , elle penetre dans leurs intentions & se rend sçauante des moindres mouuemens de leurs ames. Puissant est l'effet de la grace ; & que c'est vn antidote souverain contre la contagion du peché qui regne si absolument, & qui est si vniuersellement respandue dans le monde ! Elle trouua tant de resistance dans l'esprit de Casilde, qu'elle connut bien que ce n'estoit pas vne fille à se laisser prendre aux filets & piper mal à propos. En vain

dit le Sage, tend-on des rets
deuant les oyseaux qui vo-
lent haut; car ils les apperçoi-
uent de loin. Elle alloit telle-
ment au deuant des paroles
qui tendoient au mal, qu'en
imitant la prudence de l'aspic
elle fermoit ses oreilles aux
traistres chants de cette en-
chanteresse, qui par de doux
entretiens la vouloit mener
peu à peu au precipice de sa
ruine, & à la façon des Ar-
dans la fouruoyer parmy les
tenebres. Cette vieille forcie-
re y perdit ses secrets & son es-
crime. Si elle se descouure
trop; & que Casilde s'apper-
çoue tant soit peu qu'elle la

veut perdre, il ne faut plus penser d'auoir accès vers ce cœur tout plein d'honneur, & glorieusement ialoux de son integrité : la negociation des tenebres seroit aufsitost descouuerte par cet esprit clair & iudicieux : la mine & la sappe ne peuuét rien sur ce rocher de constance & de chasteté. A quoy se resout-elle ? à luy ietter au visage les faux rayons des pretextes specieux & honorables, que le Prophete appelle les fleches qui volent en plein iour, & la douce violence du Demon du midi. Si quelquefois elle lui parle des affections que le

Gouuerneur a pour elle, non comme ayant charge de l'entretenir, mais comme d'une chose qui est en la bouche d'un chacun; elle luy conseille en amie de ne rejeter pas sa bõne fortune, & de prendre l'occasiõ par les cheueux: & parce que Casilde rejette bien loin cette proposition, elle l'assaisonne aussitost de ces beaux mots d'alliance & de mariage: luy allegant plusieurs exemples de filles qui n'estoient ny si belles ny si vertueuses qu'elle, arriuees à de hautes dignitez par la violence de l'amour des grands Seigneurs; qui ne pouuans

entrer chez elles que par la porte de l'Eglise, s'estoient en fin resolus de les espouser.

Quelque moderation qu'on puisse imaginer en l'esprit d'une fille, si peut-elle estre esbranlee par l'espoir d'une grande fortune : & il n'est point d'ame si stupide & ennemie d'elle mesme, qui n'ait des inclinations naturelles pour son auancement, principalemēt lors que l'honneur sauue la gloire, la grandeur & l'opulence flattent son imagination d'un lustre qui l'esblouit. Casilde qui n'estoit pas insensible, ne destournoit pas tant ses oreilles

des propos de la vieille, quãd elle les accompagnoit des circonstances qui ne peuuent estre blasmees sans offencer vn si grand Sacrement : mais reuenant à elle mesme, & considerant le grand chaos qui estoit entre sa meditation & celle d'Adolphe ; elle iugeoit bien que cete apparence estoit vne illusion qui ne tendoit qu'à la surprendre. Côme les deux sœurs estoient ordinairement ensemble, il estoit mal-aisé que Melisse pust tenir ces discours à Casilde sans que Sebastie y participast : & comme elle estoit d'une humeur bien differen-

te, ie vèux dire plus vaine & moins referuee; de quel oreille pouuoit-elle entendre ces grands auantages que Melisse faisoit esperer à sa sœur, si elle sçauoit conduire sa fortune & mesnager la bienueillance du Gouverneur? L'enueie est vn ver qui s'engendre dans les plus belles pommes, & vn mal qui tire la naissance du bien d'autrui. Ce vice s'empara aussitost de l'ame de Sebastie, & la rongea de mille desplaisirs. De quel œil contemploit-elle les beautez d'ot la nature auoit auantagé sa sœur au dessus d'elle? que de jalousies troubloient son re-

pos; & combien de fois souhaitta-elle d'estre aussi agreable pour s'esleuer aux dignitez imaginaires où elle pensoit déjà voir Casilde? A vn esprit comme le sien également leger que presomptueux, il fut impossible de dissimuler les ressentimens de Melisse, dont les yeux n'auoient que faire de la fenestre de Manes pour voir les secrets de cette ame comme aussitost son alteration: & tout de mesme qu'on porte naturellement la main à vne blessure du corps; ainsi la langue se transporte vers les vlcères de l'ame. Il fut aisé à cette vicille

rusée de pénétrer les pensées de ce jeune courage: & voyant en elle des inclinations qu'elle eût desirées en Calside, elle souhaittoit quelquefois ou que Casilde eût les fantaisies de sa sœur, ou que Sebastie eût les bonnes grâces de Casilde. Elle jugea bien qu'il ne faudroit pas pousser trop rudement, cette cadette pour la faire tomber, ny la presser beaucoup pour la porter à sa perte: si bien que mettant à son arc cette seconde corde, elle s'imagina que d'une ou d'autre façon elle contenteroit Adolphe: que si elle ne pouvoit luy acquérir Rachel

elle luy donneroit Lia. Adolphe picqué de cet air importun qui luy fait perdre la patience, persecute Melisse de luy donner vne response selon son desir. Mais tout ainsi que les sortileges perdent leur force deuant la chose sacrée, toutes les sollicitations sont sans effect deuant la constance & l'honnesteté de Casilde, résolüe de mourir plustot que d'offenser sa pudeur : toutes les persuasions sont des flèches dardees contre vne enclume. Les Vagaos, comme des frellons sont à toute heure aux oreilles de cette mauuaise femme pour la haister en

l'exécution de son mauuais projet : deja ils en viennent aux outrages, aux reproches, aux menaces. Reduite au desespoir de venir à bout de son dessein, elle s'auiſa d'vne inuention tout à fait diabolique. Elle persuade à Adolphe de faire vne promesse de mariage à Casilde pour la faire donner dans le piege par le moyen de ce leurre. Adolphe aueuglé de sa passion y consent, se ſervant de la maxime de l'ancien Capitaine Grec Lyſander, qu'il falloit tromper les hommes par des paroles comme les enfans avec des osselets; & se persua-

dant que le ciel se rit des promesses & de sermens de ceux qui ayment, & que leurs parjures n'offensent que le Dieu des Poëtes. Avec cét escrit que ne se figure elle d'obtenir de Casilde? Mais cete sage fille voyant que cette fucille de papier estoit comme celle d'Asphalte qui cache vn serpent, & comme les figures de la Reine d'Egypte qui couuroient des aspics, rejeta d'abord cette escriture comme des caracteres enchantez: mais en fin charmee par les persuasions de Melisse qui ne luy protestoit qu'honneur & conseruation de sa chasteté,

elle les receut comme vn témoignage de l'ardente affection d'Adolphe, plutoſt que comme vne aſſurance de pouuoir paruenir à la gloire d'eſtre ſa femme. En ſuite de cela elle reçut pluſieurs lettres qui tenoient vn meſme langage, & qui exprimoient vne paſſion trop ardente pour eſtre de duree. O Dieu, que les filles ſages doiuent ſoigneuſemēt éuiter de donner aucune priſe ſur elles aux hommes qui prennent les moindres faueurs pour des auantages extremes ! Bien que celle-ci n'eût receu la promeſſe d'Adolphe, ny ſes autres

lettres que par importunité,
& de peur qu'il n'estendît sa
puissance en des extremitéz
qui luy eussent esté preiudi-
ciables : si est ce que ce Sei-
gneur se persuada qu'il n'y
auoit plus rien à faire qu'à
posseder celle à qui il auoit
donné vn tel gage de sa foy ,
& qu'il ne manquoit plus
que d'en trouuer les occa-
sions. Ce n'est pas sans raison
que les Poëtes transforment
leur Iupiter en tant de fa-
çons pour executer ses folies,
nous donnant à entendre par
là les artifices des Grands qui
ont recours aux deguifemens
pour éuiter les yeux & les

langues des peuples , & pour
detrouber leurs passions à la
connoissance du vulgaire. Ce
ne fut pas sans surprise que
Casilde le vid la premiere
fois en la maison de Melisse
souz vn habit bien different
de ceux qui le rendoient es-
clattant deuant le monde ;
comme si ce Iuppin eust voi-
lé sa gloire pour aborder
cette Semelé. Ceux qui sont
si malheureux que de prati-
quer avec les Demons , trem-
blent d'horreur au commen-
cement qu'ils entrent en cét
execrable commerce ; mais en
fin le Diable les accostant
souz des formes agreables,

leur leue la peur & leur donne le courage de traiter avec luy. Il en prend de mesme aux filles qui ont des intelligences secrettes avec des hommes, qu'on peut apeller pour elle des Demons incarneez: les premieres conuersations leur donnent de l'effroy & des battemens de cœur; mais peu à peu elles ne s'appriuoisent que trop. Quand elles y continuent au desceu de leurs parens c'est vn signe infailible de leur ruine prochaine. Encore que Casilde ait toujours esté vn vray miroir d'honneur, neantmoins il faut auoüer que cette tache

se trouue en cette claire Lune d'auoir souffert les cajoleries d'Adolphe comme des rencôtres qu'elle ne pouuoit euites. Tout ce que j'y voy de moins excusable c'est d'auoir continué à l'ouir sans en aduertir sa mere: car ce silence & cette condescendance ne se peut pardonner en vne fille bien auisée. Quand le loup emporte vne brebis il la préd par la gorge pour l'empescher de crier, & d'estre par ce cry secouruë du berger. C'est la coutume de ceux qui veulent seduire l'innocence des filles, de leur mettre vn sceau sur les leures, & de leur

recommander le silence, parce que ces mines euentees se dissipent à l'air & n'ont aucun effect. Ces menees ne se pûrent conduire sans que Sebastie s'en apperceust. O que de viperes s'emparerent de son sein, que d'enuies emplirent son courage : elle prend pour sa ruine propre l'auancement de sa sœur, & elle croit qu'il y va de son interest si elle n'en trauerse le progrès, & si elle n'en empesche l'issuë. L'Amour, non plus que le vin, ne haït rien tant que l'esuent. Pour empescher que Sebastie ne causast & ne reuelast toute cette tenebreuse

menee, il fallut luy mettre vn cachet d'or sur la langue & l'obliger par presens & par promesses à ne rien dire de ces particulieres entreueuës. Au commencement ce n'estoit que ciuilité, que bien-seance, que modestie. Adolpophe prenant plaisir à la conqueste d'un cœur, dont il pensoit le corps ne luy pouuoir eschapper de ses prises: La pauure Casilde, comme vne colombe seduite, n'auoit presque plus de vigueur pour resister à tant d'attraits dont ce vieux & rusé courtilan acompagnoit sa conuersation. Que si ses oreilles retenoient
tant

tant de douces paroles & tant de protestations passionnées, beuvant à longs traits la poison des cajoleries dont il l'estourdissoit ; elle se voyoit contrainte de charger ses mains de quelques bagues & autres presens dont elle n'osoit se parer, de peur que sa mere n'eust pensé qu'elle eust acquis ces ornemens par de mauvaises voyes . Sebastien n'en faisoit pas ainsi : car comme elle estoit vaine & desireuse de releuer par artifice les manquemens de sa beauté naturelle, les affiquets estoient tout son soin, & occupoient toute son attention : mais

D

quelque peine qu'elle mist à s'agencer, Casilde en sa simplicité la surpassoit tousiours avec le mesme aduantage qu'à la Lune parmy les moindres feux que la nuit fait paroistre dedans le ciel. Adolphe pour l'engager à ne le descouurir point non seulement luy faisoit des presens, mais la cajolloit quelquefois de telle façon qu'elle se persuadoit d'auoir quelque part en son esprit. Et comme elle estoit peu iudicieuse elle ne pouuoit dissimuler son aise, ny taire à Melisse combien elle eust desiré d'auoir en main la bonne fortune.

que sa sœur traitoit si dedaigneusement. A la fin Adolphe voulant terminer par vne entiere possession tant de poursuites, & se voulant donner des libertez autour de la sage Casilde, que la bienfiance ne pouuoit permettre, elle le pria de s'en deporter, & de perdre l'esperance de tirer iamais d'elle aucune faueur qui ne fust conforme à l'honnesteté, & qui ne fust rendue legitime par le mariage. Apolphe qui pensoit qu'elle deust prendre sa promesse pour vn oracle, luy iure que c'est sô intétion de l'espouser; mais que pour des railons d'e:

stat & qui regardoient la conseruation de sa renommee & de sa fortune, il ne pouuoit si tost manifester cette alliance: d'autre part qu'elle le feroit mourir si elle le contraignoit de soustenir iusques à ce téps là l'impetuosité de ses desirs. Mais la prudente Casilde voyant que ce n'estoient que des piperies qui tendoient à sa ruine, ferma les oreilles à ces discours: & s'auisant encor assez tost, quoy qu'un peu tard; elle se resoult d'a- uertir sa mere de cete poursuite, & d'imiter le petit pouffin qui se sauue sous les ailles de la poule, voyant loi-

seau de proye qui va fondre
sur luy. Blandine apres l'auoir
legerement tâcee de ce qu'elle
luy auoit celé si long temps
cette intelligence, ne fut pas
moins rauie de la prudence
de sa fille, que flattee du desir
de voir l'effet de la promesse
qu'elle luy monstra. A quel
degré de fortune les meres ne
souhaitteroient-elles de voir
leurs enfans esleuez! tefmoin
celle des enfans de Zebedee.
Ruminant donc en elle mes-
me les moyens de paruenir à
ce haut dessein, elle conseilla à
sa fille de n'effaroucher pas
vn si grand Seigneur, de peur
qu'il n'en vint à la violence :

au contraire , d'augmenter son amour par la jalouse cō-servation de son honnesteté, comme le vray secret pour en faire voler la flamme iusques au Ciel du Mariage. Tant s'en faut donc qu'elle luy deffendit la frequentation de Melisse, qu'au rebours elle se pensa fort redevable à sa voisine, qu'elle croyoit en bonne foy procurer la gloire & l'avancement de sa maison. Voyla comme le vice se pare quelquefois si accortement des liurees de la vertu, qu'il passe pour elle en l'opinion de ceux qui ne iugent des arbres que par l'escorce. Ce que

Blandine faisoit ignoramment n'estoit-ce pas exposer Casilde au precipice de son malheur, & imiter ceux dont parle David, qui sacrifioient leurs filles aux Demons, & à des Dieux qu'ils ne connoissoient pas? Neantmoins celui qui preserva des flammes de la fournaise les trois enfans qui y furent iettez, cōserua non sans miracle l'obeyssante Casilde. Durant donc ce dangereux commerce, pendant lequel Adolphe employoit tous ses artifices pour arracher de cette fille ce que la pudeur deffend, que ne faisoit l'affectée Sebastie

pour se mettre aux bonnes graces du Gouverneur , qui comme s'il eust couru apres son ombre, fuyoit celle qui le suiuoit, & suiuoit celle qui le fuioit. Tant il est vray que comme l'ayman blanc reiet-
te le fer qui est attiré par le noir, aussi l'effronterie rebut-
te les cœurs que la modestie alleche à sa poursuite. Melisse qui mettoit toute piece en œuvre pour esleuer au cō-
ble son mauuais dessein , se seruoit mesme de Sebastie pour persuader à Casilde qu'elle se remist à la volonté d'Adolphe. La sotte qu'elle est, disoit Sebastie , elle ne

ſçait pas prendre l'occafion qui luy rit : ſi i'eſtois en ſa place ie ſçaurois bien mieux ménager ma fortune. Apres que Adolphe, Meliſſe, & Sebaſtie eurent fait, mais inutilemēt, tous leurs efforts pour porter Caſilde à ſa perte, Meliſſe croyant qu'elle ne ſe rendroit iamais que ſouz quelque image de force, donna conſeil à Adolphe de la faire enleuer, ſe promettant de guerir cette playe par le téps, à qui nul mal eſt incurable. Iamais le Naphthe ne fut plus diſpoſé à cōcevoir le feu que fut l'eſprit d'Adolphe à ſe laiſſer aller à cette reſolution. Il

se retira donc vn soir en vne maison de plaisir peu esloignée de la ville : & ce soir là mesme Melisse ayant attiré Casilde en sa maison pour lui communiquer , disoit-elle , quelque secret important, elle y trouua des seruiteurs d'Adolphe, qui sans beaucoup de discours, quelque resistance qu'elle peust faire , la ietterét dās vn carosse, qui tiré par six cheuaux qui alloient comme le vent , la rendirent en peu de temps où estoit leur maistre. Quand cette fille eust esté frappee d'vn coup de tonnerre, son estonnement n'eust pas esté plus grand: ses

esprits estoient tellement esgarrez, & ses sens saisis, qu'à peine auoit elle le iugement de considerer l'extreme peril où estoit son honneur : Neantmoins dans le fond de son ame la constante resolution de le conseruer aux despens de sa vie demeuroit entiere, & rien ne pouuoit en elle esbranler cette determination, non pas mesme le bouleuersemēt de la machine du monde.

Quand Adolphe vit en sa puissance celle qu'il auoit tāt desirce, de quelle ioye ne fut-il accueilli? Mais cet e rose n'estoit pas sans espines : car encore qu'elle fût sa captiue, elle

gnalees: Mais aussi ont ils le courage si grand, que leur generosité naturelle leur donne ie ne sçay quelle secrette horreur des actions lasches & infames, sinon qu'ils soient totalement aueuglez & comme tombez en sens reprouué. Voulant donc acquerir par amour ce qu'il pouuoit facilement auoir par la force, il ressembra au Chasseur, qui n'est aspre à la proye que quand elle fuit, & qui n'en tient plus de conte quand elle est prise. Aussi eust il eu à cōtre cœur de posseder vn corps dōt l'ame eust esté esloignee: ce qui eust esté comme vn

Ixion embrasser vn nuage, ou vne image insensible comme vn Pigmalion. S'estant donc mis à genoux deuant elle par vne idolatrie assez commune aux passionnez, il essaya de gagner son courage par les plus doux propos & les plus viues persuasions dont il se pût auiser : & parce qu'il faudroit estre animé du mesme transport qui les tiroit de sa bouche pour les coucher sur le papier, il vaut mieux venir à son action que perdre du temps à représenter ses paroles. Tant qu'il parla, Casilde demeura sourde comme vn aspic, & moins sensible qu'un

ne roche qui rend quelque forte de responce par la repercussion dont se forme l'Eco. Apres les supplications & les conjurations amoureuses, il pensa que si le zephire de la douceur ne la pouuoit esmouuoir, elle pourroit estre esmeuë par le tourbillon des menaces : ce qui fit, qu'apres auoir pris vn ton plus graue, & vne contenance plus hardie selon son air & son port naturel, il luy fit mille reproches d'ingratitude & d'insensibilité : il luy mit deuant les yeux la durezza de son courage afin de la flechir, & la porter sinon à l'amour, au moins

à la pitié : & puis luy faisant connoistre ce qu'il auoit fait pour elle , & les assurances qu'il luy auoit donnees de sa foy & de sa bien-veillance, il l'appella indigne de son amitié qu'elle n'auoit iamais payee d'aucune reconnoissance. Il blasphéma la bassesse de son esprit & celle de sa condition , s'injuriant soy-mesme d'auoir attaché ses desirs à vn sujet si ingrat & si peu capable d'y correspondre. Casilde à qui l'obscurité de sa naissance n'empeschoit pas des ressentimens nobles & releuez , & dignes d'vne grande fortune, se sentant toucher en ce qui luy

estoit le plus sensible, luy
responoit qu'elle mesprisoit
egalement ses soumissions
& ses brauades, & que ses
larmes & ses discours flatteurs
luy estoient encore plus sus-
pects que ses outrages: qu'elle
n'auoit iamais esté si pre-
somptueuse de penser meri-
ter la gloire d'estre femme
d'un si grand Seigneur: mais
qu'elle auoit assez de courage
pour mourir plustost que d'es-
tre la concubine d'un Prince:
Qu'elle n'auoit jamais presté
l'oreille à ses discours que cō-
me à vne musique dont la me-
moire s'esuanoüit avec le só;
qu'elle auoit escouté ses ser-

mens & ses promesses comme des choses que l'air emportoit & qui se dissipoiént par le vent; qu'elle auoit fait aussi peu d'estat de ses escrits, sçachant qu'il y auoit aussi peu de seureté à la plume des Grands qu'à leur langue, & qu'il y auoit aussi peu de fermeté que de salut en eux: que c'estoient les ordinaires artifices dót ils se seruoient pour seduire les simples, & celles qui auoient plus de peur de desplaire à Dieu qu'aux hommes: qu'elle estoit prestee de luy rendre tous ses papiers & tous les menus presents qu'elle auoit esté con-

trainte de receuoir de sa part plus par importunité que par inclination qu'elle eust à les prendre; pourueu qu'il la laissast aller en liberté vers sa mere sans vser enuers elle de violence, son humeur & son hōneur la portant plutoſt au choix d'une chaste pauureté que d'une richesse infame. Ce mespris meſlé d'une douce grauité balança l'esprit d'Adolphe outre le despit & l'amour : mais en fin, la bienueillance fut plus forte que la colere, parce que se mettant deuant les yeux l'honnesteté de cette fille qu'il vouloit outrager, & qu'elle vouloit cō-

seruer avec tant de constance :
il iugea bien que ce desdain
ne regardoit que son action ,
non sa personne ; action aussi
deshonorable que sa qualité
estoit digne de respect. S'e-
stant donc laissé gagner à la
persuasion de Casilde & à la
connoissance qu'il auoit de
l'humeur de plusieurs fem-
mes foibles en la pudeur, qui
font semblant de fuyr ce
qu'elles desirent , & qui ne
sont iamais plus contentes
que quand elles se rendent
sous quelque figure de con-
trainte ; il se remit sur ses pre-
mieres cajolleries : & sentant
enflammer son desir (com-

me c'est la coustume) par la difficulté, il vint des paroles aux effects, & se portant à des libertez que iusqu'alors il n'auoit point entreprises, & dôt ie ne veux ny noircir ce papier ny mettre par la lecture la rougeur sur le front d'une ame pudique, il tâchoit par ces efforts messeans sinon de ruiner entierement, au moins de ternir la belle candeur de cette vertu, qui est comparee au lis, parce que cette fleur perd sa blancheur & son lustre quand elle est maniee. Casilde repoussoit avec vne vigueur incroyable, & qui surpassoit de beaucoup les com-

munes forces de son sexe ces deshonneſtes licences: & aux oppoſitions de ſes mains ioignant celles de ſa langue, elle le conjuroit par tout ce qu'il y a de ſacré, de venerable & d'auguſte au Ciel & en la terre de vouloir conſeruer en elle ce qu'il ne pouuoit ruiner ſans perdre en meſme temps la gloire de Cheualier, qui luy deuoit eſtre recommandee par ſa condition & ſa naiſſance. Adolphe aueuglé de ſon deſir brutal, ſe moquoit de ces ſainctes remonſtrances, & diſoit que ſ'il laiſſoit eſcouler vne ſi fauorable occaſiõ de iouyr de tât de

graces , elle seroit la premiere qui se mocqueroit de sa simplicité: si bien qu'il tournoit en risée tout ce qu'elle luy proposoit de plus sainct, & de plus serieux , & s'auançoit tousiours iusques à des insolences qui n'estoient plus supportables à vne fille jalouse de son honneur. De fortune il se trouua sur la cheminee de la chambre, où se trouuoit cete meschanceté aussi honteuse pour Adolphe que glorieuse pour Casilde , vn tableau de la sainte Vierge tenant son cher enfant nostre Sauueur en ses bras. Casilde iectant les yeux sur cette peintu-

re qui luy parut comme vn feu S.Elme durant l'orage, se recommanda chaudement à cette Mere & Reine des Vierges, à cet azile des affligez & oppressez , à cete protectrice de la pureté : & conjura Adolphe par la Saincteté des deux personnes que ce pourtraict representoit de ne souïller sa pureté deuant l'Image de la pureté mesme, & de se souuenir que Dieu estoit jaloux & seuer vengeur de semblables offences. Au mesme temps touchée d'une secrette inspiration, elle se iette vers la cheminee, & voulant par vne laideur artificielle remedier

medier au mal que luy cauſoit ſa naturelle beauté : ayant frotté ſes mains cōtre la noirceur de la ſuye des cendres & des charbons qui y eſtoient, elles s'en barboüille le viſage de telle ſorte qu'elle paroifſoit plutoſt vne furie & vn ſpectre qu'une fille agreable & deſirable. Mais Adolphe qui ſçauoit que le fard ne rend belles qu'en apparence celles qui ſont laides en effet, ſe mocqua de cete induſtrie qui faiſoit paroître laid ce qui eſtoit beau : & ſçachant qu'il ne falloir qu'un peu d'eau pour luy rendre ſa beauté, s'animoit d'autant

E

plus à la presser qu'il y trou-
uoit plus de résistance. De-
quoi s'auisât la genereuse fil-
le: Perisse, dit elle, la beauté
qui me cause tant d'infamie,
il vaut mieux la perdre que
la pudeur, & preuenir par
la mort vne perpetuelle infamie.
En disant cela s'eslançant
comme furieuse contre vn
des coins du jambage de la
cheminee, elle se fait vne grã-
de ouuerture en la teste, en ce
lieu où le front est voisin des
cheueux : blesseure qui luy
emplit aussi-tost de sang le vi-
sage & le sein : beau sang in-
nocent comme celuy d'Abel
demandant au Ciel vengeance.

ce contre le Cain qui la pour-
suiuoit. O beau sang immolé
en sacrifice à la fureur d'Adol-
phe, ou à la conseruation de
la pudicité de Casilde ! N'au-
rez-vous point le pouuoir d'a-
mollir ce cœur de diamant ?
Rien moins : car, comme vn
Tigre fust deuenu plus cruel
& plus farouche par le carna-
ge , il la menace de la lier si
elle continue en ce desespoir.
Acheue moy , luy disoit-elle,
barbare, & arrache mon ame
de mon corps plustost que
d'accomplir en moy ta trahi-
son & ta perfidie Ce sang
méslé avec les cendres & le
charbon luy rendoit la face

horrible: & ses yeux ruisselans des pleurs meslez avec ce sang faisoient de ses larmes vne mer rouge capable de noyer ce Pharaon, qui comme endurcy en son obstination, & tombé en sens reprouué, la tourmentoit comme vn Demon attaché à son collet, & qui ne vouloit point lascher sa prise. Mattee de trauail & de lassitude elle n'auoit plus que la voix & les cris pour se deffendre & pour appeller quelqu'vn à son secours. Dieu qui la vouloit sauuer par miracle, la laissa reduire à cette extremité, afin de faire esclatter dauantage dans les tene-

bres d'une si vilaine action la lumiere de sa misericorde : & pour monstrier qu'il ne delais- se jamais ceux qui esperent en luy, & qu'il exauce ceux qui l'inuoquent en leurs plus pressantes tribulations. Elle com- mença donc à s'escrier avec tout ce qui luy restoit de force, & à implorer le secours de Dieu des Anges & des hommes : elle crie à la violence, au meurtre. Adolphe luy veut mettre la main sur la bouche pour euitier le scandale : & puis se souuenant qu'il estoit à la campagne, il luy disoit qu'elle crioit en vain, & que s'il faisoit entrer ses gens, ce

feroit plutoſt pour l'aider à la ranger à ſa volonté, & la garrotter que pour la tirer de ſes mains. Pour tout cela, Caſilde ne laiffa de pouſſer ſes cris juſques au Ciel. En l'ancienne loy la fille Iſraelite qui auoit eſté violee à la ville eſtoit chaſtice avec ſon rauiffeur, comme ayant preſté quelque conſentement & s'eſtant rendue complice de l'offence, à faute d'auoir crié: Mais elle n'eſtoit point chaſticee quand ce malheur luy eſtoit auenu à la campagne, où la ſolitude réd le ſecours moins preſent. Mais Dieu qui donne des eaux, des chairs & de la man-

ne au desert, & qui peut en-
uoyer des legions d'Ange,
ou faire des hommes avec des
pierres dans les lieux les plus
escartez, faire porter la nour-
riture à Daniel au milieu des
Lyons, & sauuer Susanne
d'une maniere inopinee, se
seruit de l'ombre & du silen-
ce pour manifester l'attentat
d'Adolphe : & empescha la
ruine de l'innocente d'une fa-
çon si extraordinaire, qu'il
sera impossible de la lire sans
s'en émerveiller. La fermiere
de cete maison, que le Gou-
verneur auoit choisie pour y
executer ce mauuais dessein,
auoit des filles, sur qui les gés

qui suiuiôit Adolphe auoiët jetté les yeux : & selon la licence des valets dont les maistres sont desbauchez, & principalement des Courtisans; il les auoient cajolées & muguetées le soir auparavant, non sans donner de l'ombrage à cette bonne mere. Aux premiers cris qu'elle entendit de Casilde, elle s'alla imaginer que lon en forçoit quelqu'une: aussitost elle sauta du liët, & donna à son mary qui dormoit aupres d'elle ce soupçon pour vne verité. Sans s'amuser à voir si toutes ses filles estoient retirées, elle court tout droit au

lieu où elle entend le bruit que faisoit l'oppressée : son mary la suit, & aussitost ils furent tous deux à la porte de la chambre où Adolphe s'estoit enfermé. Les gens du Gouverneur qui estoient au guet les voulurent arrester: ces bonnes gens qui estoient sans lumiere dans l'horreur, les tenebres & la confusion de la nuit changerent aussitost leur doute en certitude , & commencerent à crier plus haut que Casilde mesme, à la force & à la violence. La femme hardie comme vne tygresse, de qui on enleue la littée , traaverse

ces hommes armez, & quelque menace qu'ils luy fissent de la tuer & aussi son mary s'ils passoient plus auant, elle se coula iusques à la porte, où entendant la voix d'une fille qui crioit, au ravisseur & au meurtre; elle pensa o'ïr celle d'une des siennes à qui elle dit: Courage, courage ma fille, resiste courageusement à celuy qui te veut perdre: ton pere & moy nous sommes à ton secours, nous allons enfoncer la porte & t'arracher des mains de ce bourreau de ta pudicité. Si elle auoit pensé que ce fust la voix de sa fille, Casilde s'imagina d'ouyr

celle de sa mere: ce qui redoubla son courage & reueilla ses forces presqu'abatuës en la mesme façon que les trompeteux ostent la terreur de l'ame des combatans, & les animent dans vne sanglante meslee. Adolphe qui s'estoit trouuë sans peur en des perils plus sanglants, fut saisi de la crainte secrette d'une infamie; chose que les grands courages redoutent plus que la mort: & oyant que Casilde reclamoit sa mere, & que celle qui estoit au dehors l'appelloit sa fille, il crût qu'il estoit decouuert, & que Blandine estoit accourue au le-

E vj

cours de celle qu'il auoit fait enleuer. D'appeller ses gens à son secours, il l'estimoit indigne de sa generosité, croyant que son amour plustost que la violence le deuoit rendre possesseur de ce qu'il recherchoit. D'ailleurs se representant que ce Rap viendrait infailliblement aux oreilles du Roy, Prince qui detestoit extremement des actes si indignes, & qui estant desia mal satisfait de sa retraite de la Cour l'en chastieroit exemplairement: il se resolut d'imiter Scipion, & de se vaincre soy-mesme par vne glorieuse continence, apres auoir autrefois rempor-

té beaucoup de victoires sur ses ennemis. Mais l'impetuosité de sa passion, comme vne chandelle qui s'esteint, venāt tout à coup renuerſer cette bonne penſée, luy fit ioüer à quitte ou double, & tenter les derniers efforts. Il la iette par terre & la tourmente ſi furieuſement qu'elle commence à ſe croire perduë: elle crie ſa mere, qui tempeſte à la porte comme vne furie, qui s'arrache les cheueux, & fait vn vacarme horrible. A quoy la pourroit-on mieux comparer qu'à vne poule qui voit enleuer ſes pouſſins par le milan; à l'oïſillon qui void le ſer-

pent beuuant ses œufs ; ou à celuy qui voit noyer son enfant sans luy pouuoir donner aide ? Cependant Casilde se sert de ses dents & de ses ongles pour sa defence , enfonçant les vnes dans les mains , & imprimant les autres sur le visage du Gouverneur. En cette extremité ses cizeaux luy firent vn bon office : car les tirant de sa ceinture, ainsi terrassée qu'elle estoit, elle en fit de telles blessures à Adolphe , que changeant tout à coup son amour en colere , il luy met les mains dans la gorge comme pour l'estrangler. Mais aiant honte de les souil-

ler du meurtre d'une fille, dont le seul crime estoit une invincible chasteté, il se contenta de descharger son despit à coups de pieds & de poing, dont il mal traitta cete genereuse creature, violant de cete façon aussi cruellement les loix de l'amour qu'il avoit voulu honteusement en perdre celles de l'honneur. Apres cela il ouvrit la porte comme pour la rendre à sa mere. Elle estoit si sanglante & si deffiguree, que le moyen de la mefcognoistre estoit de l'avoir veüe auparavant à la lumière qui estoit dans la chambre. La fermiere & son mari

qui ne la cognoissoient point virent bien que ce n'estoit pas vne de leurs filles, lesquelles s'estoient desia leuees, eueillees par le grand bruit que ce tumulte auoit excité en la maison. Adolphe commanda à ses gens que sur le champ on remenast Casilde chez Melisse dans le mesme Carrosse qui l'auoit amenee, la menaçant de la faire estrangler si dés le lendemain elle ne luy renuoyoit, & sa promesse & tous les escrits qu'elle auoit de luy: au reste que si elle se plaignoit de ce qui luy estoit arriué, il auoit mille moyens de la perdre & toute

sa maison. Aussitost dit aussitost executé De cette façon la pauvre Casilde au plus mauvais equipage qui se puisse imaginer fut renduë à la vieille qui l'auoit si malheureusement liuree, laquelle se pensa abandonner au desespoir, sçachant que son entreprise auoit eu vn succez si contraire à ce qu'elle s'estoit promis. Elle voulut se mettre sur les cajoleries : mais Casilde ne la voulut pas escouter, detestât en son cœur sa trahison & sa perfidie. Elle desira au moins qu'elle essuyast son visage, & mist quelque appareil à la playe qu'elle s'estoit faite au

haut du front. Mais la chaste fille qui n'auoit autre impatience que de se voir en sauueté entre les bras de sa mere, ne voulut penser à rien qu'elle ne se vist où elle desiroit. Dieu ! que deuint Blandine quand elle la vit en ce desordre ! les entrailles maternelles qui sont si tendres sur les enfans , combien furent-elles esmeuës à l'aspect d'un si pitoyable spectacle ? Ce sang , cet noirceur , ces pleurs , ces habillemens deschirez , cette contenance effrayee la rendirent curieuse de sçauoir qui auoit reduit sa fille en si mauvais estat : mais il fallut re-

mettre ce discours à vne autrefois pour pourvoir au plus necessaire. Sa playe est bandee, son visage laué, on la deshabelle pour la mettre au liét, où elle est accueillie d'une grosse fièvre qui la fait aller iusques aux portes de la mort. La jalouse Sebastie auertie de toute la menée par Melisse, faisant semblant de s'attrister du mal de sa sœur, en estoit pleine de ioye en son ame, luy estant bien aduis que l'esteuf venoit à elle : enquoy pour son malheur, elle ne fut que trop veritable Prophete. Ce fut par elle que non les papiers seulement, mais tous

les presens que Casilde auoit receus du Gouverneur furent remis entre les mains de Melisse pour les rendre à Adolphe: Lequel brussa les vns, & les autres furent partagez entre l'auaricicuse vieille, & la vaine Sebastie, qui ne visoit qu'à faire son profit & son auantage du dommage de sa sœur. Mais Dieu qui perd les voyes des pecheurs, & qui confond leurs conseils, en disposera tout autrement pour le soustien de la vertu, & pour sa gloire, comblant d'ignominie celle qui tend aux honneurs par vn chemin vicieux, & relevant en biens

& en dignité celle qui les me-
prise pour estre fidelle & con-
stante.



CASILDE.



LIBRE SECOND.

NOYONS maintenāt
ces deux sœurs dans
les balances de la Ju-
stice du Ciel : par où nous co-
gnoistrons combien la con-
duite de Dieu est equitable
& iudicieuse, & combien les
enfans des hommes sōt men-
teurs & iniustes en leur poids.
J'ai veu le meschant, dit le Roi
Psalmiste, en sureminence, &
plus esleué que les Cedres du

Liban : ie suis repassé peu de temps apres , & il estoit tellement abbatu qu'il ne paroïssoit plus. Tâdis que les boüillons de la colere d'Adolphe se rasseoient , il ne pense pas à l'Amour. Cete briefue fureur effaça tout d'un coup de sa fantaisie l'image aymee de Casilde , pour y mettre celle du mespris & de l'indignatiô : la conseruation de sa renommee est ce qui le trauaille parmi les bruits sourds qui commencent à s'espandre touchât la violence qu'il auoit voulu commettre. Sichem apres auoir enleué Dina, pour appaiser les enfans de Iacob

qui estoient ses freres, & qui ne pouuoient souffrir de la voir mariee à vn incirconcis, se soumit à la loi de la circoncision : mais quand les douleurs le presserent, il se repentit de s'y estre rangé ; mais beaucoup plus quand surpris en desordre, luy & ses gens furent saccagez. L'apprehension qu'eut Adolphe que cette action deshonorale qu'il auoit essayé d'exécuter ne portast coup à sa fortune, & n'animast dauantage le Roy contre luy, le tenoit en vne merueilleuse transe : mais parce que la Iustice humaine ne punit pas les desirs & les volon-

volontez, mais seulement les effets, faisant gloire de sa propre confusion, il vouloit tirer louange au lieu de blaine, & croyoit meriter récompense au lieu de chastiment de cette action, en laquelle selon son discours il n'auoit pas voulu faire le mal qui estoit en sa puissance. Et puis la petite qualité de Casilde s'ébloit rendre sa faute moins signalée, comme si c'estoit le droit des grands d'opprimer impunément les moindres: ce qui a fait dire au Psalmiste, Tandis que braue l'impie le pauvre est affligé. A peine Casilde auoit-elle en sa mise-

nable douleur vne voix pour se plaindre, tant elle auoit peur que cet esprit farouche en prist sujet de ruiner toute sa famille. Mais Blandine & comme femme ne se pouuât taire, & comme mere faisant hautement retentir le ressentiment de l'affront qu'on auoit voulu faire à sa fille emplissoit toute la ville de vacarme & de diuerses rumeurs, chacun faisant des iugemés selon son humeur sur la violéce d'Adolphe. Mais tous ces bruits de ville furent cōme les mugissemés de la mer quand elle est orageuse, tout ce murmure des flots s'abbat contre

sable de la greue, ou les falaises du riuage, & de l'aboyement de la tempeste il ne reste que de l'escume. Apres que le monde eut beaucoup parlé de cet euenement, il s'en lassa: & d'autres sujets commencerent à seruir d'entretien, cetui-cy se faisant de vieille dattée. Durant l'orage lors que le Nocher se voit à chaque moment prest d'estre enseveli sous les eaux, il loüe le bonheur de ceux qui sont sur la terre, & la tranquillité qu'il a laissée en son village: mais il n'est pas plustost hors du danger & arriué au port, qu'oubliant toutes ces frayeurs pas-

fees, las de la pauureté qu'il endure sur la terre, & alleché par le gain qui luy paroist en la nauigation, il remonte sur la mer abandonnant sa vie à la mercy des vêts & des ondes. Il en prit de mesme à Adolphe: la crainte d'estre diffamé deuant le Monarque, dont il redoutoit la colere en la façon que les animaux d'Affrique tremblent sous le rugissement du Lyon, le tint quelque temps en deuoir : mais sa vie qui auoit tousiours esté licenticuse, rappela bientoist apres cete bou-rasque passée ses inclinations à cet appetit sensuel, qui me-

rite aussi peu le nô d'Amour, que celui qu'ont les animaux pour vne semblable propension. Il luy faut vn sujet pour esteindre son ardeur. Les dispositions qu'il auoit remarquées en Sebastie luy repassèrent par la memoire: il en fait auertir Melisse, qui l'asseyre aussitost de la facilité de cette cōqueste. Et d'effet cette lotte fille sans aucune resistance se rendit aux premieres paroles de cete vieille, deuant qui elle auoit souuent blasmé la sœur cōme trop desgoustee. Cou-lons legerement sur ce pas glissant, & laissant les particularitez de ce vilain marché,

duquel ie ne parlerois pas si ie n'auois intention de releuer les roses de la vertu par l'opposition des espines du vice, & la haute couleur de celle là par l'obscure noirceur de celuy-cy, disons que ce fut nō sans contestation seulement, mais avec vne aueugle & desirée precipitation, que Sebastie se remit au pouuoir d'Adolphe, qui triompha de sa pudicité tādīs que cette affectee faisoit trophée de sa propre infamie. Ce fut cette occurrence qui reueilla les discours des lāgues. O combien differente fut la reputation des deux sœurs! Tandis que

par ceux qui ayment l'honneur ceteladresse seduite est chargee de plus d'execrations que le bouc emissaire des anciens, la gloire de l'aisnee est releuee iusques au Ciel, où elle paroist comme vn grand signe, reuestue du Soleil de la chasteté, d'ot la profession est ditte par le Sage, si belle & si remplie de lumiere, & digne d'vne immortelle memoire deuant Dieu, & deuant les hommes: où elle est veüe foulant aux pieds les vanitez des grandeurs mondaines, dont la Lune est le symbole, & couronnee non d'vn diademe d'or enrichi de pierres pre-

cieuses : mais d'une couronne de gloire & d'honneur, faite des mesmes estoilles qui embellissent le Ciel, ou plustost d'une couronne d'or solide & pur qui est la sainte continence, rayonnante d'honnesteté, de sainteté & de courage. Combien diuers fut le iugement des mondains qui met-tans leurs bouches profanes dedans le Ciel, se mocquoier de la simplicité de Casilde, comme si elle eust de ses propres mains estoufé sa bonne fortune; & loüoient la prouidence de Sebastie, qui auoit sceu empoigner l'occasion aux cheueux, & se preualoir

del'affectiō d'Adolphe! Mais cete prudence de la chair se trouuera en fin estre vne vraie mort, & semblable à ces Ardans qui conduisent en des precipices ceux qui suivent leur flamme infortunee. Du temps de la Gentilité on couronnoit de fleurs & de festins les animaux qu'on conduisoit aux sacrifices. Le monde en fait de mesme à ceux qu'il veut immoler à sa malice pour vn temps: il les couronne de roses, il n'y a prairie où il ne leur laisse cueillir les fleurs de mille delices passageres: mais en vn moment il les iette dans les malheurs, &

fait de grands exemples de leurs defastres. Quel creucœur pour vn temps à ceux qui estoient partisans de la vertu, de la voir si mal traittee en Casilde, laquelle reduite à de honteuses necessités, vivoit parmi les obscuritez entre les morts du siecle ! elle, & sa pauvre mere qui dōnoit mille maledictions à la desbauchee Sebastie, n'osoient paroistre pour la crainte qu'elles auoient de receuoir quelque outrage de la part du Gouverneur, dont la vengeance n'estoit pas bien assouuie : recluses comme des tortuës dans leur maison, elles vi-

uoient d'un pain de larmes, & ne beuvoient que de l'eau de douleur. Le travail de leurs mains faisoit leur nourriture. Ne vous souvient-il point du vieux Tobie, ce vertueux homme, deuenu necessiteux pour auoir trop fait de biens? Mon fils disoit-il au ieune, nous menons à present vne pauvre vie : mais nous aurons beaucoup de biens si nous craignons Dieu. C'est ce que disoit le Psalmiste, que ceux qui seruent & cherchent Dieu ne manqueront de chose quelconque. Iob fut reduit sur un fumier : mais apres sa souffrance voyez sa retribution :

tout luy fut rendu au double. Le secret des secrets c'est d'attendre Dieu dans la tribulation, de s'y porter avec du courage, & de la soutenir de bon cœur pour l'amour de celuy qui n'enuoye cette chasteuse Lia, l'aduersité, que comme avant-courriere de la belle Rachel, la prosperité. Cependant admirant la patience & longanimité de Dieu sur l'insolence de Sebastie, laquelle estant dans les biens & l'abondance iusques sur la teste, ingrate qu'elle estoit, ne daigna iamais faire visiter sa mere, ny sa sœur, ny leur offrir aucune assistance en leur be-

soin. Nous sommes en un siècle déplorable, puis que non seulement le vice y est impuni : mais il regne effrontement, se pare des liurees de la vertu, & s'empare de ses honneurs. On le farde, on le desguise par paroles, & de cette sorte on cache l'horreur que sa defformité porte avec soy. Les garces & les concubines des grands se nomment leurs maistresses, on les admet aux bonnes compagnies, on les honore, on leur defere, on les appelle madame, bien qu'elles ne soient que le sujet des infames plaisirs de monsieur. Voylà ce que fait

la flatterie du monde, qu'on peut en quelque forte nommer idolatrie politique. O temps, ô mœurs, ô mespris insupportables du saint Mariage, ô renuement de tout ordre! Sebastie pompeuse & suivie comme vne Princesse, parée comme vn temple, ornée comme vn Autel, ne paroist que cōme vn Ciel estoilé, tant elle a de perles & de brillans de tous costez. Adolphe s'estant coiffé non tant de ses beautez que de ses affecterries, ne luy refuse que ce qu'elle ne luy demāde point: ou plutoſt preuenant ses demandes, il l'accable de pre-

sens, comme s'il eust voulu
l'enchaîner ou bien l'encha-
fer dedās l'or & les pierreries.
La voyla au faiste de la roüe
& au dessus de ses esperances.
Elle regne si absolument sur
les volonteiz de ce vieillard
qu'il ne voit plus que par ses
yeux, & ne respire plus que
son haleine. Chacun s'en estô-
ne, & comme il est possible
qu'une petite esuétée ait ren-
uersé le cerueau d'un Seigneur
qui auoit autrefois paru si
prudent en sa conduite. Mais
ceux qui sçauent que la deité
qu'il fuiuoit est aueugle, ces-
seront d'admirer sa folie,
estant impossible de ioindre

la sagesse avec l'Amour, & de maintenir la raison en son entier dans vne passion si violente. Cette ferueur amoureuse ne dura gueres sans tomber dans la fureur de la jalousie. Car outre que cette frenaisie est vne ombre inseparable de l'amour sensuelle, les vieillards y sont d'autant plus sujets que les autres, qu'ils ont plus d'occasion de le défier d'eux mesmes, comme n'estans plus en l'âge qui puisse donner de l'amour, encore qu'ils en puissent recevoir. Les personnes vaines & affectees comme estoit Sebastie ne sont jamais iudicieuses, &

il y en a peu qui n'abusent insolument de leur prospérité ; de sorte qu'elles ne semblent auoir esté esleuees bien haut que pour rendre leur cheute plus lourde. Cete sorte croyant augmenter la passion qu'Adolphe auoit pour elle, ou bien la conseruer en luy donnant de la jalousie, non seulement n'euitoit pas les occasions de luy faire naistre du soupçon : mais estoit bien aise de se faire cajoller & muguer pour luy donner des ombrages. Souuēt Adolphe luy en fit des plaintes : mais comme elle estoit plaisante elle tournoit cela en ri-

sec, comme si elle eust voulu brauer celuy qu'elle pensoit tenir captif. A ses courroux elle opposoit des caresses si artificieusement charmantes, qu'il estoit contraint de luy demander pardon des offenses qu'elle luy faisoit : si bien que de ces riottes elle en tiroit des augmentations d'amour. Mais en fin ses feintes passerent en veritez, & les soupçons d'Adolphe devindrent des oracles. Son appetit desbordé ne se contentant pas de ce vicillard, elle ietta ses yeux & ses desirs sur ceux des Gentis-hommes de la suite d'Adolphe qui luy sem-

bloient plus propres à assouvir les deshonestetez: & elle en vint iusques à tel degré d'effronterie (tant l'impudéce est voisine de l'impudicité) de ne s'en cacher presque plus, ou au moins d'en donner des coniectures que les moins clairuoians pouuoient prendre pour certitudes. Ce qui mit Adolphe en la plus grande fureur qu'il eust iamaïs ressentie, & luy fit miner des vengeancees contre cette ingratte, qu'il vouloit rendre signalees pour leur excez & pour leur nouueauté. Mais parce qu'il vouloit auoir des preuues indubita-

bles de l'infidélité de Sebastie pour auoir droit de la chastier plus exemplairement, il veilloit si soigneusement sur ses actions, & mettoit tant d'épieux aux aguets, que cette ruzée s'en estant apperceuë, se tint dauantage sur ses gardes, & sans en deuenir plus moderee mit toute son industrie à pecher plus finement. Durant ce temps-là, tandis que Dieu (dont l'exercice ordinaire est de deposer les puissans de leur siege & d'eleuer les humbles, escartant les orgueilleux de l'esprit de son cœur, qui ne cherit que les personnes blessées) prepare

des chastiments à l'arrogance de Sebastie. Le temps de l'exaltation de Casilde arriue, comme s'il eust voulu renouveler en quelque sorte l'histoire de la repudiation de Valthi, & de l'eleuation d'Esther. Casilde ayant acquis la reputation d'Esther vn miroir de chasteté, & de constance, plusieurs par curiosité la desiroiét voir: mais les occasions de la rencontrer estoient si rares, que si on ne la voyoit aux Eglises, il ne falloit pas esperer de l'aborder en sa maison qui estoit close à tous les hommes, ny de l'accoster en vne compaignie: car elle

les fuyoit toutes, ſçachant qu'on ne reuient iamais meilleur des assemblees mondaines, non plus qu'on ne rapporte point de ſanté des lieux infectez. Vn Seigneur de la Prouince que gouuernoit Adolphe, & qui portoit le tiltre de l'autre, eſtant venu à la ville, & s'eſtant trouué en diuers lieux où l'ordinaire entretien eſtoit de la difference des deux ſœurs, fut eſmeu d'un ſecret deſir de voir celle qu'on diſoit n'eſtre pas moins belle que ſage. Car pour Sebaſtie elle ne paroifſoit que trop aux yeux d'un chacun, eſtant eſleuee ſur le theatre de

de la vanité, & tousiours des premieres parmi les bals & les festins. Gercon, ainsi nommerons nous ce Comte, l'y auoit veuë souuent, & souuēt il s'estoit emerueillé qu'Adolphe eust pû attacher ses affections à vne personne de si peu de merite, & mesme d'une beauté au dessous de la mediocre, & qui ne se sustenoit que par la fleur de sa ieunesse. Casilde à ce qu'on luy dit, est toute autre chose: ce qui luy donne vn extreme desir de contenter ses yeux d'un objet dont la vertu rauissoit desia les pensees de son ame. Il vsa de tant de diligen-

ce qu'il la vid au lieu seul où il la pouuoit voir, c'est l'Eglise. Il la vit donc en vn habit si modeste, avec des yeux de colombe lauees dans le lait d'une visible innocence, en vne contenance si humblé, si modeste & si deuote, qu'une mauuaise pensèe n'eust osé l'approcher, & les Demons mesmes redoutoiét l'abbord de sa pureté & de sa façon angelique. Gereon ayant desia l'ame toute pleine de l'admiration de sa vertu, & tout embaumé de l'odeur de sa bonne renommee dont il estoit amoureux, deuint en vn instant (son cœur estant disposé

deposé à cette pure flamme)
si esperdu des graces qui re-
luisoient sur son visage, que
son amour aullitost parfaite
que nec luy osta toute sorte
de discours , & ne luy laissa
que la resolution de l'auoir
pour femme ou de n'estre ia-
mais mariee. Ce ieune Sei-
gneur auoit encore sa mere &
n y auoit qu'vn an qu'il estoit
entré dans l'âge, que les loix
ont destiné à la majorité. Bien
qu'il fust en la possession de
l'heritage de son pere, & cõ-
me majeur qu'il pust vser de
ses droits : neantmoins le res-
pect qu'il portoit à sa mere,
ayant esté fort bien esleué, &

G

l'esperoir qu'il auoit d'en tirer beaucoup de bien s'il se tenoit dans son obeïssance, le fit resoudre à luy communiquer son dessein, & de tâcher d'auoir son consentement pour ce mariage. Sur cete bonne pensee il se determina de voir Casilde & de luy parler, pour voir si son esprit respondoit à son visage & à cete grande reputation de vertu & d'honnesteté qu'elle auoit acquise dans le monde : car non seulement personne ne disoit mal d'elle, en quoy l'escriture met la plus grande gloire de la vaillante vefue qui deliura Bethulie : mais il

n'y auoit celuy qui ne la com-
blast de l'ouanges & de bene-
dictions. C'e fut pourtant en
vain qu'il essaya de l'abbor-
der : car cette rose estoit en-
uironnee de tant d'espines, &
elle euitoit la rencontre des
hommes avec tant de soin &
par des fuittes si estudiees,
qu'il ne put iamais luy parler.
On dit que les cheuaux qui
ont esté retirez de la gueule
du loup s'ont fort ombrageux,
& la Colombe qui s'est vne
fois sauuee des serres de l'oy-
seau de proye, tremble au
mouuement de la moindre
fucille. Cette fille ayant vne
fois esté si proche de son nau-

frage, tenoit la conuersation des hommes plus perfide & desloyale que les flots de la mer : de sorte qu'au lieu de s'y fier, leur veuë & leur entretien luy estoit en horreur. Blandine sa mere, bien que toute effarouchée, & de la desbauche de Sebastie & de ce qui auoit esté attenté en Casilde, ne laissa pas pourtant de parler à Gereon, qui n'ayant que del honnesteté dans son intention, ne pésoit pas en estre si rudement traité en luy proposant le desir qu'il auoit de prédre Casilde pour sa femme. Blandine s'estant enquisse de sa qualité, & pre-

nant garde à son âge & à sa bonne mine, crût que c'estoit vn leurre à vn appas qu'un dessein serieux & veritable: & croyant que ce fût vn ieune courtisan qui se voulust ou iouïr de sa simplicité, ou surprendre sa fille par cete ruze, non seulement elle ne fit aucune responce à sa proposition : mais elle le renuoya si rudement, que si ce Seigneur n'eust eu beaucoup d'Amour pour la fille, la rudesse de la mere eust esté capable de le rebuter. Mais le feu dont il estoit espris, est en cela conforme à ces feux d'artifice qui brulent dans les eaux, & se

rendent plus ardans par le vinaigre. En vain iura & protesta-il à cette femme, qu'il parloit à la bonne foy & sans aucune mauuaise pensèe: plus il faisoit des sermens, moins estoit-il crû. En vain essayail d'obtenir la permission de parler à Casilde: car cete mere qui en estoit ialouse comme de son tresor, & qui la veilloit avec plus de soin que le dragon, qui ne dormoit iamais, n'en employoit à la garde des pommes d'or du iardin des Hesperides, ne le voulut iamais consentir. Et Casilde qui n'auoit autre mouuemēt ny volonté que le comman-

dement de Blandine, obserua si exactement la deffence qu'elle lui fit de voir Gereon & de luy parler, que prenant tout homme pour luy, afin de ne le regarder pas, elle n'en consideroit aucun autre : Ce qui met ce Gentil-homme en des impatiences qui se peuvent plus aisement imaginer que depeindre. En fin ne sçachant par où empoigner ces chastaignes herissées de toutes parts, ny comme abborder ces roches dures & inaccessibles, il s'accosta d'un des proches parens de Blandine, homme de bon sens & accort : lequel iugeant que

Gereon parloit avec trop d'ingenuité & trop de passion pour n'auoir que de la feinte dans l'ame, & qu'il meritoit bien qu'on luy fist vn autre accueil que celuy qu'il auoit receu de ces femelles esfarouchées, luy promit de faire en sorte qu'il seroit ouy, pourueu que les choses se passassent avec honneur, & n'eussent autre fin que le mariage. La gloire d'vne alliance si releuee, & l'appuy qu'il espera de ce Seigneur le luy fit souhaitter pour mary à sa parente : n'y ayant rien qui flatte tant l'esprit des gens de mediocre condition que de

dire vn tel Comte ou vn tel Grand est de ma parenté, & i'ai ce bien de luy appartenir. Il se rendit donc entremetteur de cette affaire: & adoucissant les esprits de Blandine & de Casilde, il les rendit plus traittables, en les asseurant que s'il ne voyoit toutes choses dans les bornes de l'honnesteté, il aymeroit mieux mourir que de s'en mesler. Mais comme il estoit Sage il leur conseilla de se conduire en cecy la bride à la main, & d'y marcher avec circonspection comme sur des cendres mises sur des charbons ardés, & comme sur des fleurs où

des serpens seroient cachez. La ieunesse de Gereon leur estoit autant suspecte que sa qualite: ils sceurēt qu'il auoit encore sa mere, & resolurent de ne souffrir point cete recherche qu'ellen'y cōsentist, afin que tout se menast avec la bien-seance qui doit accō-pagner les œuures de lumie-re. Ce fut vne medecine peu amere & bien difficile à aualer à Gereon, l'extreme inegalite de sa condition & de celle de Casilde, iointe à l'humeur hautaine de Prisque sa mere, de laquelle il desesperoit d'obtenir le consentement pour vne alliance tellement

disproportionnee, le met-
toient en vne angoisse incon-
ceuable. Il fait voir qu'il est
majeur, qu'il est en possessiõ
de ses droits qu'il veut bien
rendre ce deuoir à sa mere de
luy demander ce congé: mais
que ne l'obtenant pas, sa pas-
sion le porte à passer outre, &
à preferer son contentement
à cette obeyssance. Cependãt
ni Casilde ni sa mere ne veu-
lent point entendre à cete re-
cherche quelque auantageu-
se qu'elle paroisse, si elle n'est
iustificée par l'accez de la Cõ-
tesse Prisque. Phoras le pa-
rent de Blandine qui condui-
soit cete negociation, n'estoit

pas d'avis qu'on observaſt tant de ceremonies, eſtimant que c'eſtoit aſſez que ce mariage ſe fiſt à la face de l'Egliſe avec toutes les ſolemnitez qui ont de couſtume de s'obſerver en l'adminiſtration de ce Sacrement. Mais il ne pût jamais perſuader à Caſilde qu'il n'y euſt en ce mariage quelque tache de clandestinité, ſi la mere du Comte n'y conſentoit auſſi bien que Blandine : & afin de ne donner aucune occaſion à la medifance, de dire qu'elle euſt amuſé Gereon à ſa poursuite, & l'eueſt abuſé par ſes attraits, tant elle eſtoit curieue de rendre ſes

voyes droites , & de cheminer en la splendeur du iour avec honnesteté; iamais elle ne voulut l'entendre ny le voir en aucune compagnie. Le Comte ne la pouuant considérer qu'à l'Eglise, où elle ne pouuoit pas empescher qu'il ne se trouuast: mais ne l'osant abborder, soit par la reuerence du lieu, qui n'est pas destiné à de tels entretiens que ceux que sa passion luy eust dictéz ; soit pour le respect qu'il portoit à la sainteté & à la vertu de cete fille, qui pouuoit estre appelée vn Temple viuant du S. Esprit: Il voulut employer la plume au

deffaut de la parole qui luy estoit interdite: mais les escrits luy furent renuoyez sans estre leus , ce qui le mettoit en vne peine incroyable: mais quelque peine qu'il eust il ne demordoit pasvn seul poinct de sa resolution, qui estoit ou de mourir ou de venir à bout de son entreprise car de viure sans posseder Casilde, c'est ce qu'il ne pouuoit faire entrer en son esprit. Apres auoir cherché inutilement tous les moyens de soulager sa passio au moins de quelque parole, il part & va trouuer sa mere en sa Comté, en dessein de la coniuurer si elle aimoit sa con-

seruation, de consentir qu'il recherchast & espoufast cete fille. A la proposition qu'il luy en fit avec toutes les submissions les plus humbles & les coniurations les plus pressantes dont il se pût auiser, il ne trouua qu'un rebut accompagné de termes si aspres qu'il desespera aussitost d'obtenir de sa mere la grace qu'il luy demandoit. Quelles reproches ne luy fit-elle de la lacheté de son courage, pour auoir abbaisé ses yeux sur vn sujet si esloigné de la grandeur de sa maison & de la gloire de son sang? Que de menaces de malediction au

lieu de benediction s'il continuoit à aimer vn sujet si peu digne de son alliance & si disproportionné à sa condition! Quelles protestations de ne prester jamais son consentement à des nopces tant inegales, mais d'y apporter toutes les oppositions & les obstacles qui seroient en sa puissance, & d'employer tout son credit, & d'armer tous ses parens & ses amis pour renuerfer vn dessein si ruineux à leur famille! En somme elle n'oublia rien pour le diuertir & luy dissuader vne entreprise qu'elle estimoit également honteuse que defauantageu-

se. Mais tout cela ne guerissoit pas la playe de Gereon, au contraire, il rendoit son vlcere plus enuenimee & sa passion plus violente. Toutefois il se fit tant d'effort, qu'il dissimula le mieux qu'il pût ses ressentimens : & pressant dans le silence vne extreme douleur, sa modestie le retint de repartir à sa mere selon que luy dictoit son deplaisir. Aiait tousiours esté bien eleué & nourry avec vn grand respect vers celle qui l'auoit mis au monde, il ne voulut pas l'aigrir par des repliques qu'il estouffa dans sa bouche, bien qu'il les ruminast en son ame.

Mais comme vne feu qui est clos redouble la vehemence de son ardeur , ainsi fait la douleur quand elle est ferree. Cete contrainte le rendoit si morne & si refueur, que peu à peu il deuint si chagé d'humour & de visage, qu'il n'estoit plus reconnoissable: la viue couleur qui paroissoit en son teint s'esuanoüit, & les roses y font place à des lys qui le rendent aussi blefme qu'un trepassé: la ioye s'enfuit de ses yeux & de sa bouche & n'y laisse que les pleurs & les plaintes: les cōpagnies où il paroissoit auparauant si plein d'attraits & avec tant

d'auantages, luy deuiennent odieuses; il fuit & la veuë & la lumiere pour s'entretenir ou plutoſt pour ſe ranger dedans l'ombre & le ſilence. Il ne voit plus le Soleil qu'avec peine, & la nuit ne luy eſt delicieuſe qu'à cauſe qu'elle nourrit ſes ennuis de fortes reueries. Ny la chaffe, ny le ieu, ny la conuerſation, ny les exercices, rien ne le peut diuertir, & c'eſt accroistre ſa triſteſſe que de luy dire qu'il ſe reſiouiſſe. Ce n'eſt plus qu'un fantoſme, un ſimulacre uiuant ou plutoſt vne ombre de cimetiere. Priſque voit cet eſtat deplorable de ſon fils &

s'en attriste, elle n'en ignore pas la cause : & neantmoins son courage plus fort que sa compassion naturelle n'estoit tendre ne luy permet de rabatre vn poinct de sa seuerité, ny de le soulager de quelque rayon d'esperance. Depuis que le chagrin & la melancolie ont gaigné vn cœur, on ne les en chasse pas si aisement, qu'on les empesche de s'y establir : ce sont des limes sourdes qui rongent insensiblement, & qui menent au riuage de la mort auât qu'on s'en soit apperceu. Ce pauvre Gentil-homme batu de deux vents contraires de l'Amour

qu'il auoit pour Casilde, & de la reuerence qu'il portoit à sa mere, dont l'un luy donnoit du desir, & l'autre luy leuoit l'esperance, ne pouuāt plus soustenir la vehemence de ces passions, & voyant son art surmonté par la tempeste, fut contraint de lascher le timon : & laissant aller sa barque à la merci de l'orage il s'abbatit sous l'effort d'une fièvre ardente & continuë, qui en peu de iours fit iuger aux Medecins que la seule mort en seroit le remede. Ce fut icy la pierre de touche qui esprouua l'amour maternelle de Prisque, & qui rompit en

elle l'obstination dont elle auoit iusqu'alors fait rempar contre les iustes desirs de son fils. Elle auoit bien d'autres enfans, mais la plus grande part estoient des filles, qui sôt plutoſt des fardeaux que des ſoulagemens en vne maison: elle auoit vn petit fils qui auoit eſté dès ſon berceau, ſelon la mode des grandes maisons, deſtiné à l'Eglise & ſur la teſte duquel ſe repoſoient de grands & gras benefices qui estoient comme hereditaires en la famille. Gereon estoit toute ſon eſperance: & comme il estoit l'aiſné & le chef, il estoit auſſi tout l'appui

& tout le soustien de la maison. Ce qui l'afflige le plus est de se sentir comme coupable de sa perte pour la rigueur qu'elle luy a tenuë, & la feuerité dont elle a mal traité son bon naturel. Encore si elle eust flatté sa passion de quelque parole, & temperé son amertume de quelque lenitif, elle seroit en quelque façon soulagée : mais au poinct où il estoit, cette repentance luy estoit inutile, & les promesses de le contenter estoient tardives & hors de saison. Néanmoins encore vaut-il mieux se reconnoistre tard que jamais, & aux extremités on se

sert de tout ce qui peut apporter du soulagement. Elle l'abborde, & le voyant les yeux nageans en la mort & l'ame sur le bord des levres, afin que le trespas lui soit moins amer & qu'il passe à vne meilleure vie avec quelque sorte de satisfaction, elle luy témoigne le regret qu'elle a de lui auoir esté moins pitoyable : & prend le Ciel à tesmoing, qu'encore qu'elle se sente criminelle en ayant donné sujet au déplaisir qui l'auoit réduit à ce poinct, elle est neantmoins innocente en sa volonté, son dessein n'ayant iamais eu autre but que son

son bien & son auancement,
& sa resistance à ses desirs,
n'ayant esté fondée que sur
l'obligation qu'elle pensoit
auoir de s'opposer à sa ruine.
Mais que si la repentance ef-
façoit toute sorte de crime,
elle pensoit estre purgée de
celuy-là: veu la douleur qu'elle
auoit de luy auoir esté si
cruelle. Que son malheur la
rendant sage luy seruoit de
cilice pour luy faire tomber
les escailles des yeux, & luy
faire connoistre que la ri-
gueur met le feu aux plaies au
lieu de les guerir, & qu'il ne
faut pas tousiours au faict du
mariage tât regarder les biens

H

& les naissances que les inclinations & les affections: Veu que les biens ne sont que pour les personnes, & non les personnes pour les biens; estant beaucoup plus raisonnable d'aiuster la pierre de la fortune à la regle des volontez, que d'appliquer la regle des desirs à la pierre ondoiante & incertaine des facultez temporelles. Et que s'il plaisoit à Dieu exaucer les prieres qu'elle luy faisoit pour sa santé, elle ne se rendroit plus si obstinee à le contrarier: mais qu'elle tâcheroit de luy complaire par vne iuste & raisonnable acquies-

cence. A ces mots si differens de ceux que cette mere impetieuse auoit de coustume de faire sonner aux oreilles de ce fils respectueux & obeissant, le pauvre Comte d'une voix casse & mourante repartit en ces termes: Madame, ie ne scaurois mourir plus satisfait qu'en rendant la vie à celle qui me l'a donnee. Les fleuves n'ont point de repos qu'ils n'ayent rendu pour tribut à la mer les eaux qu'elle leur a communiquees en leur source. Ie ne me suis proposé durant ma vie autre but que la gloire de vous honorer & de vous obeyr : c'estoit là le

H ij

devoir auquel ie vous estois obligé par ma naissance. Si la fin d'un chacun est sa felicité, la mienne est accomplie par les derniers sanglots que ie rends entre vos bras combattu de pensees & de desirs qui m'estoiét agreables, mais qui vous deplaisoient. I'ay mieux aimé choisir vne mort sombre , & estouffer mes plaintes dans le silence, que de viure & me soulager en vous desagreant. Aussi, Madame, me fusse-ie estimé indigne d'estre sorti de vous, si i'eusse apporté quelque alteration à vostre repos, & troublé le contentement & la

paix de vostre famille. Je ne me plains que de mon malheur, & non de vostre résistance, puis que celle-cy a esté fondée sur de grandes raisons, dont ie n'ay pû me rendre susceptible, parce que l'excès de ma passion m'en auroit rendu incapable. Tout au plus ie ne puis estre accusé que d'auroir aymé vn sujet extrêmement aimable, & de qui les vertus (sans parler de ses beautez que le temps peut & doit fletrir) meritent non pas vn Comté, mais vn Royaume. Le Ciel m'en a voulu priuer, parce que i'en estois indigne, & il s'est ser-

ui de vostre opposition pour
arrester le cours de mes espe-
rances. Madame , c'est en
vain que vous les voulez re-
fuser pour des promesses
qui ne sont que sur vos levres
& non dans vostre cœur , ie
ne suis plus en estat de rece-
voir du soulagement de cette
douce feinte. Je vous prie de
me laisser souffrir en paix la
mort à laquelle vous m'avez
condamné, & que ie reçois en
patience, puis qu'elle me viét
d'une main de qui les blessu-
res mesmes me sont vénéra-
bles. Au moins, Madame, ne
me refusez vous pas vostre
dernière benediction, puis

que ie meurs non seulement dans vostre obeissance, mais pour vous obeyr , au lieu de cette malediction dont vous me menassiez si ie me fusse rendu refractaire. C'est ce que ie vous demande pour derniere grace Madame, & avec toute l'humilité de mon ame, afin qu'elle s'en aille contente trouuer celle de mon pere entre les bras de Dieu. Il se teut ici, & en ce faisant il laissa vn double deplaisir dans le cœur de la Comtesse par le souuenir de son mary, & la perte visible de ce ieune Seigneur qui en estoit le portraict animé. Sa douleur fut

fi violente qu'elle demeura long temps si stupide, que de toutes les fonctions de la vie il ne luy restoit que de celle des yeux qu'elle tenoit fichez sur ce fils mourant. A la fin ils se troublerent & elle tomba en vn long & estrange esbahissement, que durant quelque espace de temps elle fut tenuë pour passëe. Quel rengregement de mal fut-ce au pauvre Gercon, qui s'outrageant soy-mesme de paroles se disoit malheureux & comme parricide, pensant estre cause de cette mort. A la fin à force de remedes on vit re-
paroistre quelques signes de

vie, & à peu de temps de là elle reuint entierement à soy, si c'est reuenir à soy que d'en sortir par les transports & les paroles desesperées que l'amertume de ses regrets fit sortir par sa bouche. Je n'en veux point faire le recit, puis qu'aussi bien ce ne fut pas la raison qui les profera : mais vn regret si grand qu'il ne pouuoit former de petites plaintes. Mais son plus vif ressentiment estoit de ce que s'il prenoit pour feintes les promesses qu'elle luy auoit faites de bonne foi & de toute la sincerité de son ame, de consentir à ce mariage qu'il

auoit desiré s'il reuenoit à conualefcence. De cela elle prenoit à tesmoing celuy qui sonde les reins, qui penetre nos pensees, & que rien de caché ne peut tromper. Sur quoy se mettant à faire des sermens capables de faire naistre de la certitude en l'ame la plus douteuse, il semble que ce soufflé refuscita ce pauvre mourant & luy redonna l'esprit de vie. Car comme la Lune eclipsée par l'opposition de la terre reprend vne nouvelle clarté quand le Soleil la regarde : & tout ainsi que la lumière chasse les tenebres : aussi la cause de cette

maladie qui estoit la tristesse; & le desespoir venant à cesser, l'effect peu à peu commença aussi à diminuer, & dans peu de iours des portes de la mort où le chagrin auoit precipité Gereon, il se vit releué à celles de la santé. Que le Prouerbe est véritable, Le peril passé on se moque du Sainct que lon a inuocqué avec beaucoup d'ardeur. Le Comte ne fut pas plustost en cōualescence que la Comtesse sa mere oubliatout ce qu'elle luy auoit si solennellement promis. Il est vray que pour donner fueille & couleur d'excuse à

son inconstance & se priuer du blasme de parjure, elle fit vne assemblée de parés pour leur demander leur auis touchant ce mariage : lesquels preoccupez & de ses prieres & des raisons que leur reueloit la sagesse humaine, qui est vne prudence de chair & de sang, & qui ne regarde que les interets & les maximes du monde, ils conclurent que Gereon n'y deuoit pas entendre s'il ne vouloit par cette mes-alliance ietter vne honteuse tache sur sa posterité. Pauvre vertu, qu'il est aisé à voir que ton Roiaume n'est pas de ce monde! car si tu en

estois , il feroit au moins autant d'estat de toy que des richesses ou des honneurs passagers : mais tu es si peu estimée de luy , qu'il te compte pour rien : & si vne fille n'a de l'argent , elle auroit autāt de perfections que le Ciel montre d'estoiles , elle est mise parmi les choses delaissees. Voylā Gereon debouté par cet arrest de ses pretensions , & rentre de fièvre en chaud mal, ie veux dire de la tristesse dans la rage. Que ne dit-il contre l'influence de só estoille , mettant sa bouche dans le Ciel , & vomissant contre les astres innocens

ce que la fureur fait pousser à
 vn esprit qu'elle possède! A
 quoy me reserve, disoit-il,
 l'insolence de ma mauuaise
 fortune? n'eût-ce pas esté vne
 action plus pitoiable de me
 laisser mourir, lors que mon
 ame toute destachee de mon
 corps par l'effort de la mala-
 die, estoit desia sur le rempart
 de mes dents preste à s'enuo-
 ler au Ciel, sans me rappeler
 à vne vie pire que mille morts
 par vne fausse esperance?
 O esperance, seul bien de
 ceux qui n'en ont point d'au-
 tre, que tu es bien appellée le
 songe de ceux qui veillent.
 Pourquoi m'as tu rappellé

au monde pour y souffrir des malheurs si cruels , & pour y servir d'un spectacle de pitié? Or sus reuenons, puis que la seule mort est le port de nos disgraces, & le seul & farouche remede pour esteindre le feu de nostre Amour. Belle & vertueuse Casilde , au moins ie mourrai vostre, puis qu'on ne veut pas que vous veniez à moy , & que ie viue avec vous. O Ciel, receuez ce double sacrifice de mon amour & de mon obeissance. Casilde pourra estre à un autre, mais Gereon ne sera iamais qu'à celle qui l'a rauy à luy mesme par son incompa-

nable vertu. Ainsi plaignoit
ses deplaisirs cet infortuné
Gentil-homme, & quelque
fois tâchant de charmer son
enuie par la musique, il imi-
toit le Cigne qui ne degoise
iamais de si doux accens que
quád il est voisin de la mort.
Le sauuage estat de ce Sei-
gneur, dont tout le monde
auoit de la compassion, tou-
choit quelquefois de tédres-
se le cœur de la mere: Mais
soudain elle opposoit à la
delicateffe de ces sentimens
son grand & hautain coura-
ge qui ne luy permettoit pas
de rabbatre vn seul poinct de
la noblesse de sang, ny de

souffrir que son fils l'offen-
çast par vne alliance raualee.
Voyla comme la vanité qui
cache sa teste dans les nuees,
se reuolte contre la nature, &
bouleuerse tout ordre pour
maintenir l'effor de son vol.
Si Gereon craignoit Dieu ,
iugez le par le respect qu'il
portoit à sa mere. Il n'osoit
donc par le desespoir auancer
son trespas , sçachant quel
horrible sacrilege commet-
tent ceux qui sortent de la
sentinelle de cete vie sans en
estre releuez par le grand Ca-
pitaine qui les y a mis en gar-
de, & qui a le nombre de nos
iours dans sa main. De viure

aussi en de perpetuelles angoisses, c'est-ccà quoy il ne se pouuoit resoudre. Tandis qu'il auoit ainsi la mort en desir & la vie en patience, il fit cōme ceux qui sōt en plaine mer à deux doigts de leur naufrage: la terre leur manquant ils n'ont recours qu'au Ciel. Il s'auisa de mourir d'une mort ciuile, puis que la naturelle ne venoit point à son secours. Vous sçauiez que l'estat Religieux rend morts au monde ceux qui s'y voüent. Il se resolut par vn sainct desespoir de se ietter dans vn Cloistre pour y trouuer dans le sein de Dieu le re-

pos qu'il ne pouvoit esperer dans le siecle. Heureux dessein, glorieuse entreprise, par laquelle il reconnut cette verité sacree que tout bien arriue à ceux qui cherchent Dieu & qu'il exauce ceux qui courent apres luy. Qui eût jamais pensé que par la fuite du mariage il fût arriué à celuy qu'il desiroit ? Mais Dieu a des secrets admirables, & des iugemens incomprehensibles, il n'appartient qu'à luy de tirer le contraire de son contraire, la lumiere des tenebres, & les ris du milieu des pleurs : il a vne telle industrie pour auster les voiles qu'il fait auan-

cer par des vents opposez, & de la mort mesme il fait reial-
lir vne source de vie. Parmy
tant d'ordres Religieux qui
rendent l'Espouse de l'A-
gneau parée de tant de bel-
les diuersitez, il arresta son
desir dans l'ordre sacré du
Religieux de saint François
de Paule, que nous apellons
Minimes. Les vœux de sa
mere à ce Saint auoient cõ-
me impetré sa naissance, il
crût que pour reconnoissan-
ce il deuoit rendre à Dieu en
sa Congregation ses vœux
Religieux. Il mesnagea si
bien cete inspiration, qu'aus-
sitost elle deuint resolution,

& de cette resolution sans tarder il passa à l'exécution. La bonté de son naturel jointe à l'eminence de sa condition , luy firent aussitost trouver place parmi ces Saints personnages , en la société desquels il desiroit s'incorporer. Mais parce que la prudence Religieuse ne veut pas qu'on entreprenne rien à la volée & sans vne meure deliberation accompagnée d'un bon essay selon la sainte coustume des compagnies bien reglees , il fut tint quelques iours en son habit seculier dans le Conuent, où il s'estoit ietté, pour luy donner loisir de penser à

sa vocation , & escouter en
paix & en silence ce que le
Seigneur diroit à son ame. Il
se retira sans bruit & sans en
auertir sa mere, sçachāt qu'il
faut quitter le monde com-
me Iacob laissa la maison de
Laban sans le consulter , &
prendre congè de luy. Cette
retraite ne peut estre long
temps celee à Prisque , & ce
fut vn assaut à son esprit d'au-
tant plus violent qu'il auoit
esté moins preueu. Que de-
uint-elle l'ayant apprise ? cer-
tes vn esclat de tonnerre
l'eust frappee avec moins
d'estonnement. La voyla
aussitost en campagne à la fa-

çon de Laban, qui se mit à
poursuiure Iacob aussitost
qu'il fut sorti de sa maison.
Elle cognoist l'humeur de sō
fils; & bien qu'elle sçache que
le desespoir l'ait porté à ce
dessein Religieux, elle sçait
qu'il mourra plustost que de
se departir de cete entreprise,
s'il l'a vne fois commencee.
Elle veut parer à ce coup &
rompre cete resolution auant
qu'elle soit executee. Il est ai-
sé d'arracher vne plâte nou-
uellement mise en terre, dif-
ficile quand elle y a ietté de
longues racines. Arriuee à la
porte de ce Monastere, elle y
fait vne tempeste qui trouble

consolee iusques à ce que sô
 fils paroisse deuant ses yeux.
 Ce bon Pere qui craint que
 Pharaon cet amour de la
 chair & du sang ne suffoc-
 que au berceau l'Israelite la
 vocation Religieuse de Ge-
 recon, a de la peine à se resou-
 dre de l'appeller pour paroi-
 stre deuant cette mere esplo-
 ree. Le sel vient de la mer, &
 se fond aussitost qu'il y est re-
 mis. Le Religieux vient du
 monde, & il deuient vn sel
 gasté & fondu aussitost qu'il
 s'en r'approche : plus il s'en
 peut esloigner, tant mieux
 pour sa conseruation. Neât-
 moins l'exces de la tourmen-



te, que cete femelle irritée excitait, ne se pouvant accroître que par la production de ce lonas enfermé dans une cellule comme dans le ventre d'une Balene, il le fallut appeller. Que cete mere fut consolée, quand elle le vit encore en son habit ordinaire! car s'il eust pris celui de Minime, elle eust perdu l'espérance de l'en voir despoillé. Alors apres mille conjurations maternelles capables de faire fendre des rochers, voyant que la constance n'en estoit point esbranlée, mais qu'il demeuroid ferme en la resolution de passer à l'esten-

dard de la Croix à trauers toutes les considerations de la nature , & que rien ne le separeroit de la Charité du Sauueur , elle se mit aux outrages & aux reproches , dót le ton aigre & poignant luy estoit plus facile à supporter que celuy des attrails de douceur, dont son ame estoit auparauant attendrie & charmee: tant il est vray que les rayons du Soleil sont plus capables de deuestir vn hōme que les froides bouffees de la bize. Qu'vne ame agitée d'vne passion violēte a des mouuemens desreglez & inefgaux. Apres auoir co-

iuré & menacé, tourbillons
contraires, à la fin elle reprit
ses premieres larmes : & ne
pouuant le tirer de cet azile
sacré & le remener avec elle,
seulement elle le coniure par
ce qu'il y a de plus auguste &
de plus sainct en la terre &
au Ciel de differer sa vesture,
& de luy dōner loisir de voir
Casilde: car peut-estre dit-
elle, que ses vertus pour qui la
renommee n'a point assez de
langues, pouuant suppleer
au deffaut de sa naissance &
de ses commoditez, si ie la
trouue par là digne d'estre
ma belle fille, ie vous pro-
mes solemnellement par les

images & les autels sacrez,
dont cete Eglise est ornee, &
par la foy que ie dois à ce
grand Dieu qui y est adoré,
de vous la donner pour fem-
me. Vous ne pouuez raison-
nablement me refuser ce de-
lay, autrement ie vous don-
ne toutes les maledictions
qu'une mere peut donner à
vn fils ingrat & refractaire.
Ce coup de foudre mit en
cendre toutes les resolutions
de Gereon : & tout de mes-
me que le diamant ne se peut
briser qu'il ne se reduise en
poudre, ny le plomb se fon-
dre que tout à coup ; aussi ce
fut en vn instant que toute sa

fermeté fut abbatuë. Mais parée qu'il craignoit de l'artifice & de la surprise, il ne voulut point sortir du Conuent, se tenant en estat de prendre l'habit Religieux au cas que sa mere n'accomplist sa promesse. C'estoit là l'unique moyen d'esbranler sa determination: car il n'estoit pas encore si mortifié que l'image des graces de Casilde ne nageast tousiours dans sa fantasie, & ne luy liurast à tous momens des atteintes & des allarmes. Combien est puissant l'effort de la vertu, puis qu'elle gagne en vn instant les cœurs les moins dis-

posez à luy vouloir du bien: On dit vn iour à Olympias la mere du grand Alexandre, que la belle Cempasté estoit vne Magicienne qui tenoit son fils enchanté par ses sorcelleries: mais aussitost qu'elle l'eut veüe, sa Magie dit-elle est naturelle, ses charmes sont en sa modestie & en sa beauté. Le semblable auint à Prisque, elle n'eut pas plutost abordé Casilde que les rayons de beauté qui luisoient sur son visage, la vertu de son ame qui reluisoit en ses propos & en ses actions, & les charmes inuitables de sa conversation luy rauirent telle-

ment le cœur qu'elle s'escria,
O ma fille, ta renommee est
au deffous de ton merite, &
ta presence surmonte & effa-
ce tout le recit qu'on m'a-
uoit fait de ta valeur. Quel-
les doiuent estre les graces
de la vertu, & comme ravi-
roient-elles les esprits si elles
estoiient visibles: puis que ces
foibles estincelles qui en pa-
roissent aux actions humai-
nes ont des appas si attrayás?
En vn moment Prisque est
changee, & tout son regret
est de s'estre opposee si long
temps au bon-heur de cette
alliance: d'opposante elle de-
uiant suppliante, & se iettant

au col de Casilde , Ma chere fille , luy dit-elle , ie te prie ne dédaigne point de prédre mon fils pour ton mary: outre que sa naissance & ses biés t'y conuient, si tu n'es ennemie de ton auancement, son amour t'y oblige, qui l'a porté à des extremittez qui ne peuuent tirer leur origine que d'une passion qui ne peut en sa vehemence estre comparee qu'à elle mesme. A ce discours Casilde deuint toute esclattante de cete pudeur vermeille, qu'un ancien appelle la liuree de l'honesteté: vne rose fraichement espanoüie iette vn feu moins

vif & eclatant que celuy qui
sortoit de ses iouës , & n'e-
stant pas trop dresse'e aux ce-
remonies, & aux paroles de
complimens , son modeste
silence respondit pour elle
en deux termes qui rauirent
le cœur de la Comtesse. Dieu
que de gloire apres tant de
travaux , que de splendeur
apres tant d'obscuritez, que
Blandine estoit pleine de
merueille, de voir la bonne
fortune qui se preparoit
pour reuestir d'honneur &
de biens sa fille plus aymee!
Prisque arreste & conclud ce
mariage. Gereon est appel-
lé qui y accourut , non com-

me à des nopces, mais comme à des felicitez celestes. Priſque auſſi reſiouye que le Pere de famille Euangelique ſur le retour du prodigue, & ne ſe pouuât raffaſier d'embrasser ſa belle fille, euſt donné de la ialouſie à Gereon ſ'il euſt peu en prendre d'elle, luy voiant cueillir des baiſers qu'il penſoit luy appartenir, mais qu'il ne pouuoit obtenir qu'après la benediction de l'Egliſe. O Hymen, ce n'eſt pas ſans raiſon que les anciens voiloient la diuinité, & que meſme parmy les Chreſtiens on ſe ſert d'un voile dans les ceremonies du

mariage, puis que les rauissements de Gereon se doiuent voiler d'un filéce ingenieux. Les paroles estant incapables d'en représenter la douce violence. Ainsi Casilde vint en la possession de ce ieune Comte, plus content de l'acquisition de ce thresor de vertus que s'il eust esté fait Empereur de Trebizande. Bien que Sebastie fust en un degré de fortune en apparence plus eminent: en effet neantmoins elle estoit incomparablement inferieure à sa sœur. Car à quoy sont bons les biens sans honneur? & les voluptez ne sont-elles

pas mesprisables, qui ne s'achettent que par la perte de la reputation qui est d'un prix inestimable? Aussi la difference fut-elle extreme entre leurs conditions : car l'une marchoit sur vne mer de verre & de glace qui se creua sous ses pas, & la fit perir en la façon de cete Baladine qui eut pour recompense de sa dance la teste du plus grand d'entre les enfans des hommes : & l'autre fondee sur la feure & solide baze de la vertu, ne fut pas sujette au tour de la rouë de la fortune. mais & durât sa vie & en sa lignee elle fut comblee de benedi-

ctions selon qu'il est escrit, que la generation des iustes fera benie, & que la semence des meschans perira miserablement. Ce ne fut pas aussi sous vn cœur rongé d'enuie & des yeux jaloux que Sebastie vit la bonne rencontre que sa sœur auoit faite, & si elle eust pû trauerser só bonheur, elle en eust bien-tost empoigné l'occasion: tant il est vray que le bien d'autrui est le mal de l'enuieux, & qu'il deuient maigre de la prosperité qu'il voit arriuer à vn autre. Les nopces de Casilde se passerét à petit bruit, & la Comtesse Prisque fem-

me pleine d'honneur & de vertu ne voulut point que Sebastie y fust conuice. Surquoy elle prit sujet de murmurer, & du murmure de passer à de tels tesmoignages de mescontétement, que pour ce mespris qu'elle disoit qu'on auoit fait d'elle les menaces sortoient de sa bouche aussitost que les desseins de vengeance furent entrez en son esprit: mais les moyens de l'executer luy en furent ostez par la retraite de Casilde, qui se retira au Comté de son mary avec Prisque sa belle mere, & la bõne Blandine sa mere, laquelle com-

me vne autre Noemi fut renduë participante de la prosperité de cette vertueuse Ruth Tandis que cettenouvelle espouse est parmy les aises & les contentemens de son nouveau mesnage , & que le miel de la prosperité luy paroist plus doux apres l'absinthe de tant de disgraces : Prenons le temps de considérer la decadence de Se-bastie qui arriua par vn iuste iugement de Dieu , qui ne souffre pas que la voye des pecheurs prospere trop long temps. Nous auons dit que ce feu d'honnesteté qui bru-loit dás ses venes ne se pou-

uant esteindre par le vieillard Adolphe , cete flamme volage la portoit à la recherche de nouveaux objets , ce qui mettoit mille marteaux en la teste du Gouverneur , selon le Prouerbe ancien , qui nous apprend que le liët & le diademe ne peuuent souffrir de compagnon. A la fin l'insolence de cete perdue arriua iusques à ce point d'effronterie de se laisser rechercher presque sur le visage d'Adolphe. Si bien que n'employant plus ses ruses, ses dissimulations & ses artifices pour se cacher , elle ne se promettoit pas seulement

estre fidelle; proietta d'en prendre vne vengeance si haute, que son horreur la redroit signalee. Mais ayant honte de souiller ses mains & ses armes d'un sang si vil & si peu considerable, il pensa qu'il valloit mieux luy donner le congé pour chastimét, la liberté pour prison & la vie pour supplice. Ce qui ne se pouuoit mieux faire que la redant aussi pauvre qu'il l'auoit comblee de richesses, en la chassant avec honte, & l'exposant à la iuste mocquerie de ceux qui l'auoient auparauant iniustement honoree. Il luy osta donc tous les pre-

sens qu'il luy auoit faits, & par vne vengeance vtile il reprit par force les plumes qu'elle lui auoit arrachees par subtilité. Apres cela l'ayant chargée de reproches, d'iniures, d'outrages, & l'ayant honteusement conuaincuë de ses deshonestes legereztez par des tesmoignages irreprochables, pleine de confusion & de vergogne (si le front d'une femme impudique est capable de rougir) il la mit à la porte: si bien qu'elle se vid en vn instant sur le pauuë destituee de tous moyens & de toute assistance. Ainsi lors qu'elle y pen-

soit le moins elle cheut tout à coup du faiste de la grandeur, où elle faisoit paroistre vn orgueil insupportable dās vn abisme de misere qui eust fait pitié aux moins sensibles, si en faisant reflexion sur sa vie passée on n'eust veu la main de Dieu iustement appesantie sur elle. La bouche de la mesdisance & de la calomnie adiousterēt à ce traitement des circonstances plus rudes & honteuses, & voulut-on faire croire qu'Adolphe pour contenter sa fureur la fit foüetter impitoyablement, & la donna en proye aux infames desirs de

ceux qui l'auoient traittée de la sorte. Mais c'est vne chose qui a tousiours esté iugée fort esloignée de la verité pour ceux qui en ont esté les mieux informez , & qui est tout à fait contraire aux mœurs & à la generosité de ce grand personnage. O Sebastie ! c'est maintenāt qu'abandonnée aux larmes & aux regrets comme vne Ariadne laissée par vn Thesee, tu recognois à ton dam que la peine talonne la coulpe cōme l'ombre est attachée au corps , & que si les meules de Dieu roulent lentement, elles escrasent bien menu.

C'est à present que tu es arri-
uee en haute mer, & que la
tempeste t'engloutit. Voyez
neantmoins cōme les fleaux
ne peuuent cōuertir ce cœur
de Pharaon, & cōbien il est
difficile d'oster les mouchet-
tures à vn Leopard & la
noirceur à vn More: ie veux
dire que mal-aisément on se
deffait des mauuaises habi-
tudes quand on les a vne fois
contractées. Au lieu de chā-
ger de vie comme elle chan-
geoit de condition, & de re-
garder le Ciel en ce grand
bouleuersement de sa tortu-
ne, elle fit comme ces vieil-
lards de Sulanne qui abbaiss-

ferent leurs yeux pour ne la pas voir : & au lieu de s'aller réfugier vers sa sœur, & jeter entre les bras de Blandine sa mere, qui sans doute l'eust humainement accueillie en voyant la repentance, elle se relança dans le monde à la façon de ce Pilote, qui ietté contre vn escueil par la tempeste, voyant perir son vaisseau & sa marchandise dans les flots, se relança dans la mer par desespoir : ne voulât plus viure après vne telle perte. La malheureuse Sebastie voulant acheuer de se ruiner, comme despitee contre le Ciel qui la chastioit pour la
rame-

ramener à resipiscence , se mit plus avant que iamais dans la desbauche , pensant de cette sorte se mettre à l'abri de la necessité. Mais cōme elle auoit peu de beauté elle fut peu recherchee , & ceux-là mesme qui l'auoient mugueteé plus par vanité que par amour , lors qu'elle estoit en eminence, pareils à ces araignes qui ne tendent leurs toiles qu'en des lieux esleuez, la mespriserent quand elle en fut descheuë. Je souïllerois & ce papier & l'imagination des Lecteurs si ie descriuois les desreglemens de cette infame

K

Courtisane. Il me suffit de dire d'elle comme de la Magdeleine, qu'elle estoit pecheresse en la Cité sans laisser dans les esprits qui apprendroient ses desbauches, bien que ce fust en des termes qui les detesteroient, des impressions dangereuses. La fin ordinaire de ces eshótees, c'est de tomber par pieces dans vn Hospital, ce qui auint à celle dont nous deplorons la misere: mais ce ne fut qu'apres que la patience de Dieu se fut lassée de la supporter. La necessité, qui est vne dure & fascheuse maistresse, l'ayant reduite à des extremitéz, auf-

quelles elle pouuoit dire, Je ne ſçay point trauailler & i'ay honte de mendier ; elle fut cōtrainte d'auoir recours à ſa ſœur la bonne Blandine, ayant peu de temps aupara-
uant quitté cette vie pour vne meilleure. Caſilde pleine de pitié l'eût volontiers accueillie: mais Priſque auoit trop de courage pour ſouffrir qu'une creature ſi difſamée polluaſt ſa maiſon par ſon abbord : elle reſſembloit à la mer qui ne peut ſouffrir de charognes, mais les iette ſur ſes riuages. De ſorte que Caſilde ne la pouuant retirer l'asſiſta d'argent, & fit en ſor.

te qu'une vefue de bonne vie la prit chez elle en une bourgade qui n'estoit pas éloignée du Chasteau où elle faisoit sa demeure, quoy que cela despleust à Prisque. Neantmoins Gereon iugeât que c'estoit trop de rigueur à sa mere, & qu'il estoit bon d'imiter Dieu qui ne veut point la ruine du pecheur, mais sa Conuersion & sa vie, trouua bon que sa femme assistât cete chetive lœur, pourueu qu'elle voulust mieux viure que par le passé. Et d'effect cette vefue qui la prit en garde ayant des enfans il y en eut vn qui se picqua de ce

peu de bône grace qui estoit en Sebastie , & nonobstant ses desbauches se resolut de l'espouser pour la ramener à vn meilleur train. Ce fut icy que parut la misericorde en Gereon & en Casilde, qui la doterent liberalement & conformément à l'estat & à la condition de son mary. Mais tout ainsi que le serpent engourdi de froid que le poisó mit dans son sein, picqua son bien-faicteur aussitost que la chaleur luy eut rendu les esprits, cette fausse femelle n'eut pas plustost ressenti l'aïse & la prosperité de son nouveau mesnage, qu'en elle se

refueillerent ces anciens appetits qu'elle auoit pour quelque temps couuerts des cendres de la dissimulation, mais non pas esteints. Le souuenir de son ancienne fortune luy fait mespriser la presente, & au lieu de benir Dieu des commoditez qu'elle possede elle ne peut durer dans cetemediocrité, la prosperité de saœur luy rongeāt sans cesse l'esprit, & la piquant du mortel aiguillon de l'enuie. Au lieu de faire penitēce de ses fautes passées, elle en proiette de nouuelles, & quoy qu'elle eust vn mary ieune, & qui ne l'aimoit

que trop, elle retourne à son vomissement & se rend plu-
 tost recherchée que recher-
 chée. Si autrefois elle ne s'e-
 stoit pas souciee de donner
 des ialousies à vn Gouver-
 neur de Prouince, beaucoup
 moins se soucie-elle d'en fai-
 re naistre en l'esprit d'un sim-
 ple Marchand comme estoit
 son mary. Les soupçons pas-
 sent en veritez, aussitost la
 voyla descritee par la bourga-
 de & par tout le voisinage.
 Comme son mary en est en
 vne rage de mesuree, il en fait
 ses plaintes par tout qui vo-
 lent aux oreilles de Gercon
 & de Casilde: il surueille ses

actions, & ce que font tous les ialoux il cherche avec impatience ce qu'il craint de rencontrer: mais en fin il ne le trouue que trop tost à sa honte & à son dommage. De quelles fureurs son ame n'est-elle agitée? il ne parle que de sang & de mort. A la fin de peur de se ruiner de fond en comble, il se resout de mettre en cage cette beste farouche, & s'il ne peut la reduire au bien, de l'empêcher de faire mal. Il la met en prison: mais que ne penetre la subtilité d'une mauuaise femme? Elle corrompt ses propres gardes, & c'est par là
mesme

mesme qu'elle trouue sa deliurance : Elle s'enfuit donc avec vn mauuais garçon qui l'auoit replongee au mal emportant avec elle tout ce qu'elle pût arracher de plus precieux des coffres de son mary. Abbregeons la funeste & tragique Histoire de ses malheurs. Elle s'en va inconnuë par le monde avec son galan qui l'abandonna aussitost qu'il en fut rassasié, luy iouïant du mesme tour qu'elle auoit fait à son mary, & ne luy laissant que ce qu'il ne luy pût oster. Apres auoir erré vagabonde comme vn vaisseau battu de la tempeste

L

& qui n'a plus ny mast ny an-
cre ny timon : On dit qu'en
vne ville maritime sur leriua-
ge de cete coste où la mer se
couronne de bouquets d'o-
rangers, estant sur le point de
s'embarquer pour fretter en
Italie où elle croioit que sa
marchandise auroit quelque
debit, elle mourut miserable
dans vn Hostel-Dieu frappée
de ce vilain mal que le iuste
Ciel enuoye pour fleau à l'in-
continence, & qu'on peut
appeller infame en donnant
à l'effet le nom de sa cause.
Telle fut la fin de cette mise-
rable qui verifie ce mot des
pages sacrees que la mort des

pecheurs est tres-mauuaise. Combien differente fut celle de Casilde, laquelle ayant vescu couronnée de gloire de biens & d'honneurs, & iouï de toutes les felicitez qui peuuent rendre vne vie heureuse, mourut apres vne longue suite d'annees, dans le plaisir c'est à dire en la grace de Dieu, laissant vne belle & chaste lignee qui conseruera sa memoire bien auant dans la posterité. Elle vescut chérie de sa mere, benie de sa belle-mere, adoree de son mary, honorée de tout le monde & tenuë en veneration mesme par Adolphe qui

protesta depuis qu'il eut
chassé Sebastie que comme il
n'auoit iamais rien rencon-
tré de plus digne de haine
que cete estontee, il n'auoit
iamais trouué de plus rare
vertu que celle de Casilde,
vertu esprouuee en l'une &
en l'autre fortune. Vertu qui
auoit attiré sur elle tant de
graces & de faueurs du Ciel,
selon qu'il est escrit, que la be-
nediction de Dieu sera sur la
reste du iuste, & qu'il sera en
memoire eternelle sans au-
cun sinistre bruit. Son cœur
dit le diuin Chantre, estant
toufiours prest d'esperer en
Dieu, il ne faut pas s'eston-

ner s'il en est fortifié , & s'il ne s'esbrâle point pour tous les efforts qui le trauerfent. En fin il n'est que de se tenir au tronc & au mast de la vertu , & quelque orage qui nous tourmète de s'attacher à ce ferme rocher qui se rit des vents & des vagues. Si pour vn temps il est couuert de flots , tousiours sa teste luee & lissée s'esleue vers le Ciel & se mocque de la colere des airs. Tost ou tard la retribution arriue & chacun la reçoit selon son œuvre de la main du iuste Iuge. Aprenons seulement de cette Histoire, le malheur de l'incon-

tinence, & par opposition
le bon-heur de l'honne-
steté.

Fin de l'Histoire de Casilde.

Extrait du Priuilege du Roy.

PAR grace & Priuilege du Roy il est permis à I E A N M O R E A V, marchand Libraire, demeurant en nostre ville de Paris, d'imprimer ou faire imprimer, vendre & distribuer, tât de fois qu'il luy plaira, vn liure intitulé *Casilde, ou le Bon-heur de l'honesteté*, par Monseigneur DE BELLEY, avec defenſe à tous Libraires & Imprimeurs, & autres personnes, de quelque estat & condition qu'ils ſoient, d'imprimer ny en extraire aucune choſe, ſans le congé & conſentement dudit M O R E A V, pendant le temps & terme de ſix ans, à compter du iour & datte que ledit liure ſera acheué d'imprimer, ſur peine de conſiſcation des exemplaires qui en ſeront trouuez, & de mille liures d'amende, moitié à nous applicable, & l'autre moitié audit M O R E A V : Comme plus à plein eſt contenu & déclaré és lettres dudit Priuilege. Donnée à Paris le dou-

ziesme Iuin mil six cens vingt-huict,
& de nostre regne le dix-huict.

Par le Roy en son Conseil.

RENOVARD.

*Acheué d'imprimer le vingt-neufiesme
Iuillet, mil six cens vingt-huict.*



